



宋蘓子由表啟

元祐八年生日謝表

進郊祀慶成詩表

免南郊加恩表

謝南郊加恩表

汝州謝上表

雷州謝上表

謝復墳寺表

謝復官表

分司南京到筠州謝表

降朝請大夫謝表

賀擒鬼童表

謝入伏早出狀二首

謝坤成齋筵狀

賀雪御筵謝狀

辭尚書右丞劄子二首

免尚書右丞表二首

謝除中書舍人表二首

謝除戶部侍郎表二首

謝賜對衣金帶馬表

謝翰林學士宣召狀二首

謝賜對衣金帶鞍馬表

謝除龍圖閣學士御史中丞表

謝除尚書右丞表

生日謝表

陳州張公安道謝批荅表二首

齊州李肅之諫議謝表

代李諫議謝免罪表

南京張公安道免陪祀表

張公謝免陪祀表

南京百官賀南郊表

南京謝頒曆表

張公謝南郊加恩表

李誠之待制遺表

陳汝羲學士南京謝表

張公安道乞致仕表三首

張公謝致仕表

滕達道龍圖蘓州謝上表二首

賀毆陽少師致仕啟

賀致仕曾太傅啟

賀韓相州啟

賀何陽文侍中啟

謝張公安道啟

賀趙少保啟

賀文太師致仕啟

除中書舍人謝執政啟

張聖民修撰謝二府啟

李諫議謝二府啟

陶石簣先生批選唐宋六家表啟

宋眉山蘇軾子由

元祐八年生日謝表

老逢誕日、泣親養之無從、賜出天厨、愧君恩之莫報、中謝伏念臣生於窮陋、晚被寵榮、粗飯垢衣、未改生平之舊、嘉肴旨酒、每驚日食之豐、復緣載育之辰、曲霑馭幸之典、室家交慶、心口自慙、此蓋伏遇皇帝陛下、儉以約身、優於養士、勅廩人而繼粟、閱褐父之駢盛、力行舊章、以惠列辟、德非易物、澤

配漏泉、矧茲異數之隆、非復周行之比、食無避難、
敢忘臣子之心、志在屬厭、更誦古人之戒、

進郊祀慶成詩狀

恭以莫大之儀、成於一日、無窮之澤、施及四方、歡
聲所同、和氣畢應、伏惟皇帝陛下、奉烈祖之成憲、
蹈文母之訓言、臨御七年、慎守一德、人服孝慈之
化、物知仁厚之心、神祇降休、麥禾薦熟、長日既至、
舊章不忘、以爲再享明堂、未暇園丘之大祀、躬謁
皇帝、久稽先帝之遺言、惕然不寧、述而非作、是用

修合祭之舊、補不講之文、人情所安、神意昭答、况
復肆青之令、一寬於冥頑、已責之恩、大弛於纍繫、
施仁於不報之地、收福於無求之中、臣每侍清光、
畧聞大旨、勉強吟咏、形容盛明、愧周頌二后之精、
深乏唐賦三禮之廣、麗圖寫天日、自知難成、間雜
風謠、猶或有取、

免南郊加恩表

叨陪祀事、已極忻榮、貪冒寵光、實增愧畏、
以皇帝陛下、紹統六聖、臨政七年、愛敬盡於事親、
中謝 恭

故道要而用博終始念於典學故德修而弗知間者稽叅古今並享天地人情既協神理弗違月朔以還雨雪猶作齋宿之際風霾未除及夫晝漏盡而天宇肅清月幾望而雲物晏燦執玉而進如將弗勝受福以歸謙不自有衆庶如堵歡欣一詞此則聖性得於自然臣下望而莫及曾何誤寵橫及無勞伏望皇帝陛下徇固請之誠收已行之命福胙既均於在列名器豈宜以假人益慎予奪之權深厲廉耻之節眇然微願冀在必從

謝南郊加恩表

元祀告成靈貺昭答推廣乾坤之施普霑臣子之私顧惟何勞竊冒斯寵

中謝

伏惟太皇太后陛下

母儀三世坤載四方享天下之養而非以厚其身攬天下之務而非以私其族培附帝業保佑神孫譬如農夫之養苗耘鋤以俟其長玉人之作器琢磨而望其成厲之以講學之勤示之以聽斷之敏導之事天而天錫之福訓之祀地而地應以和凡下民所以知戴吾君皆東朝有以啟迪其意如臣

等輩絕企光塵。雖復因時以舉儀，祇令以從事。參備羽衛，進執豆籩。豈有勞能，坐被光寵。此蓋伏遇太皇太后陛下，因脈膺之餘慶，錄左右之微勤。以謂承天之休，不可以專享；及物之惠，不嫌於過優。致此誤恩，首霑近列。辭避無所，寢興莫違。

汝州謝上表

論事非宜，本虞於大譴。承命出守，猶荷於寬恩。中
謝伏念臣性本迂愚，學非練達。頃值時乘之始，偶同彙進之餘。由一邑之棲遲，歷九年之僥倖。遍塵

侍從，未聞毫髮之勞。久處廟堂，滋見斗筭之陋。踈拙日慙，於君父蒲盈。每誚於友朋，貪戀寵光。不知引避，愚而自用。言之不疑，寡慮直前。初獨任其狂斐，干時妄作。信自取於顛隲，尚賴深仁。黜臨善地，此蓋伏遇皇帝陛下，堯舜相受，常懷善繼之心。父母兼容，深照不逮之實。稍寬憲法，特許省循。收去幹之蒐，雖知甚幸。若喪家之犬，私竊自憐。恐懼未忘，寢興何暇。有民與社，永和愧於明時。使過與愚冀，或收於異日。

雷州謝表

謫居江外已閱三年再斥海濱通行萬里罪名既重威命猶寬中謝伏念臣性本朴愚老益頑鄙連年驟進不知盈滿之爲災臨出妄言未悟顛危之已至命微如髮釁積成山比者水陸奔馳霧雨蒸濕血肉星散皮骨僅存身錮陋邦地窮南服夷言莫辨海氣常昏出有踐蛇茹蠱之憂處有陽淫陰伏之病艱虞所迫性命豈常念咎之餘待盡而已伏惟皇帝陛下仁齊堯舜政述祖宗日月之明無

幽不燭天地之施有生共霑憐臣草木之微念臣犬馬之舊未忍視其殞斃猶復許以生全臣雖棄捐尚識恩造知殺身之何補但沒齒以無言

謝復墳寺表

名書罪籍慙負明時思念私塋特還舊刹九泉受賜荒隴生光中謝伏念臣早以空疎叨居近密始終無補愚不自量恩禮誤加驟及既往一被黨人之目上遺先臣之憂舊恩已移沒齒何覲豈謂詔恩一出故物復還丘塋絕芻牧之虞松檟變焦枯

之色、骨肉感涕、閭里咨嗟、此蓋伏遇皇帝陛下性
仁、無私、聖孝不匱、覽二帝初潛之地、動一物失所
之懷、號令所加、存沒感賴、臣衰病已久、報恩之日
不長、子孫在前、竭忠之心、未替、過此以往、無所裁
之、

謝復官表

誕膺八寶、承天地之休、連錫二階、均雷雨之施、恩
深難報、感極何言、中謝伏念臣憂患餘生、老病兼
至、廢黜雖久、尚霑品秩之餘、奉養雖微、更獲藉耘

之助、一毫以上、皆出於君恩、累歲偷安、有慚於公
議、復叨寵數、深屬無名、茲蓋伏遇皇帝陛下天造
曲成、聖功獨運、深憐枯槁、重許發生、示人以無私
之心、施德於不報之地、臣雖頑鄙、粗識恩私、筋力
已衰、莫展驅馳之用、忠誠尚在、豈以生死而移、

分司南京到筠州謝表

愚守一心、漫無趨避、歲更三黜、始悟愆尤、中謝伏
念臣家傳樸學、仕偶聖時、本無意於功名、徒自勤
於翰墨、因時乏使、亟塵言事之班、竊食無功、復預

聞政之列、纔經九歲、遍歷要塗、人心忌其超遷、天
意惡其盈滿、捫心自省、事猶可追、任意直前、罪所
從出、惟闇故不明利害、惟拙故不達幾微、以至罪
積如山、命輕若髮、薦經彈擊、雖九死以猶輕、黜守
幽遐、累千里而爲近、今茲責分留務、棄置陋邦、不
親吏民、許追思其過咎、稍霑祿秩、俾粗免於飢寒、
人微固無可言、恩深繼之以泣、自違天日、分委泥
塗、朝無爲言、恩出獨斷、此蓋伏遇皇帝陛下、法天
廣覆、配地兼容、雖雷霆之震驚、與雪霜之嚴冽、未

始絕物之命、要在厚民之生、故茲賤微、猶得陳述
臣之自取、本復何言、顧惟兄弟二人、迭相須爲、性
命江嶺、異域恐遂隔於存亡、况復墳墓闊疏、父子
離散、若臣家之憂患、實今世之孤窮、靜言思之、誰
可告者、惟有自投於君父、庶幾有冀於生全、泣血
書詞、叩闕仰訴、生有捐軀之日、死存結草之誠、

降朝請大夫謝表

罪大恩寬、言者未厭、官高德薄、法所不容、尚領真
祠、實出寬憲、中謝伏念臣早塵近列、無補明時、下

則拙於身謀、上則闇於國體、先朝矜其愚陋、宥以遐荒、前後七年、浮沉萬死、偶真人之御歷、敷大號、以惟新、普復舊官、亟叨厚祿、然臣年迫衰暮、知復何爲、身利退藏、顧未敢請、因循於此、黽俛自慙、雖復追削者、五官仍且獲安、於閑局涵恩、至厚爲幸、已多、此蓋伏遇皇帝陛下、以堯舜之仁、行成康之政、秉未忘於舊物、恩許畢其餘生、臣謹當杜門躬耕、沒齒蔬食、知生成之難報、姑靜默以待終。

賀擒鬼章表

天網雖寬、久而必獲、神理助順、叛者自亾、曾是偏師之出疆、遂聞元惡之授首、諸戎震疊、西鄙肅清、

中賀

伏惟太皇太后陛下、天覆四方、坤載萬物、好生之德、發於自然、柔遠之功、覃於無外、昆蟲草木、咸知此心、天地鬼神、陰相其業、顧西蕃之遺種、孤累聖之鴻私、頃在熙寧之間、誘陷思立之衆、置而不問、猶覲知恩、爵秩兼隆、賜予不絕、而乃潛結西夏、攻圍南川、焚蕩傷夷、動以萬計、發掘驅虜、不可數知、築據臨洮、傲睨天討、當宁太息、念疆場之無

辜諸將激昂知背誕之不赦兵刃既接凶黨奔亾
臨衝未施壁壘自破老羗奪氣白首就擒卽聽檻
車之行以正豪街之戮乃者托跋小醜憑恃解仇
之謀猖狂大言陰蓄窺邊之計唇亾則齒知難久
臂解則肩不自持料其破膽之餘款塞無日信矣
得天之助本於愛物之誠臣等鎮撫無功黽勉備
位幸依干羽之化庶覩兵革之藏欣戴之心倍萬
倫等

謝入伏早出狀

伏以火老而煩金微斯伏忽被早歸之詔仰慙內
恕之恩退食委蛇撫躬戰汗臣等叨塵近輔與聞
政幾庇廣厦之清陰飽素食而終日方慙懼於無
補何勞苦之足云伏惟太皇太后陛下推已及人
使臣以禮深念早衰之質許以中晷之休顧惟民
事之至艱盖有日入而後息臣等敢不上懷主眷
俯念人勞廣清淨之餘風致安佚於無外

又狀

伏以候極南訛日臨庚伏方齋居之暇豫閱政務

之勤勞、亟命遄歸、得從燕息、臣等猥以一介、獲覽
萬微、殫日力而不遺、知寸陰之可惜、惕然祇畏、敢
有怠荒、伏惟皇帝陛下、雞鳴求衣、日旰忘食、致海
內無警急之奏、而朝廷有清淨之風、膺化國之舒
長、念暑雨之咨怨、曾匪賢勞之久、遽蒙夙退之安、
臣等敢不上體眷懷、益勵愚拙、更寒暑而不易期、
歲月之有成、

謝坤成齋筵狀

清光可企、初奉萬年之觴、妙供已成、共薦三乘之

福、遽傳溫詔、式燕羣工、舉罄管以示和、陳肴核而
飽德、與衆同樂、既均夷夏之歡、俾壽而康、當遂臣
鄰之願、

賀雪御筵謝狀

伏以、近自頻年、每愆時雪、聖心勤念、雖淵默以無
言、天意密符、變凝陰而有作、飛花先自於宮闕、布
潤俄遍於寰瀛、九軌澄清、已消塵塹之濁、三農踊
躍、載歌牟麥之豐、臣等幸此有年、共安無事、錫之
醴酒、益知和氣之充、飫以肴烝、願均足食之惠、醉

飽盛德歌舞休功

辭尚書右丞劄子

臣備位南臺言事無補上負朝廷開納之意下孤朋友責望之誠徒以厚恩未酬欲去不忍豈謂非常之命猥加無補之臣矧復二轄之官萬幾所在苟用人之一失實取輕於四方如臣奮自諸生誤叨近侍嶮嶇縣道曾未數年出入周行莫聞顯效資地淺薄積薪有後來之譏德業空虛在梁有不稱之誚伏乞追寢成命少安愚衷上以全二聖知

人之明下以成孤臣審已之分

又狀

命降自天輒形懇避恩不加譴猶辱訓詞輒緣覆燾之私復伸愚陋之懇蓋陳力事上常自止於不能而量才用人亦當務其已竭况臣位居執法職在繩愆苟有官非其人爵踰於德法所當治臣敢弗言今者擢寘近班實爲虛授若遂暱俛居位臣既自已知非苟復傳播於人衆必指爲無耻在他

人猶爲不可况本職之所當言幸別選於長才冀

稍安於私意再殫誠悃非敢飾詞所有誥命不敢
祇受

又狀

特遣使車宣布君命里巷改觀親黨增光雖聖聰
之未回抑愚言之可聽與其順旨而使聖朝不獲
所任曷若違命而使柄臣舉惟其人用此力辭期
於得請昔楚有子玉文公爲之側席衛多君子季
札知其未亂若公卿類皆骨鯁則精神足以折衝
今雖忠賢在朝股肱協力不宜雜用小器以示乏

人臣能知難國之福也苟不度德民何觀焉尚冀
察臣危誠追寢前命俾得粗陳薄技以効一官旣
獲謀身之宜非無報國之所進退兩得家國俱安
其於微臣豈非厚賜

免尚書右丞表

首居言責無補聖時方有黜幽之虞遽聞躡等之
命辭而不獲情實難安中謝伏念臣家世寒賤兄
弟戇直早坐狂言流落江湖而不返晚逢興運聯
翩禁近以偷安恃聖神之誤知蹈嶮夷而莫顧前

後、歷、居、於、臺、諫、彈、擊、多、召、於、怨、尤、每、圖、自、安、之、宜、
惟、有、早、退、之、便、徒、以、受、恩、未、報、中、夕、以、興、進、退、皆、
艱、徬、徨、自、失、敢、有、望、於、殊、寵、以、自、速、於、煩、言、矧、茲、
丞、轄、之、嚴、號、居、弼、諧、之、貳、觀、用、人、之、當、否、知、爲、國、
之、重、輕、如、臣、迂、闊、而、寡、謀、孤、直、而、多、怨、進、用、茲、始、
已、或、紛、然、眷、遇、儻、隆、安、能、自、保、伏、望、太、皇、太、后、陛、
下、眷、求、一、德、以、允、僉、言、慎、名、器、之、假、人、念、衣、裳、之、
在、笥、亟、收、前、命、以、保、危、蹤、苟、無、隕、越、之、憂、盡、出、生、
成、之、造、

又表

臺轄之重、國論所存、顧惟尺寸之材、何與棟梁之
選、比陳誠懇、尚闕俞音、中謝伏念臣家世寒、儒僅

守父兄之樸學、文史末技、不通邦國之大猷、頃自
元祐之初、偶緣乏使、召自南遷之後、遽責使言、旋
由左史而踐掖垣、復從右戶以居翰苑、迨茲執法、
曾未數年、言何補於聖明、志已殫於憂責、以一日
遭逢之幸、擅諸臣積累之榮、方懷蒲溢之虞、願求
閑散之便、豈意思恩私之橫被、復叨丞轄之近班、自

昔政事之臣、非處書生之地、既犯不韙、其何敢安、
伏望皇帝陛下、以德愛人、量才付位、深察斗筭之
陋、難堪鍾鼎之藏、追還誤恩、選建明德、俾賢愚各
安其所、則中外無復間言、其於微臣受賜多矣、

謝除中書舍人表

執筆柱下、已愧空疎、起草禁中、尤爲清切、上慙主
眷、下愧人言、中謝伏以西臺政教之原、紫微論思
之地、緝熙庶政、事得稽參、進退具寮、言成訓誥、昔
趙孟治晉、叔向爲之謀主、則楚無以當國、僑爲鄭

子羽掌其詞令、則國鮮敗事、今臣所領、頗近於斯、
宜得博達詳練之人、踈通敏捷之士、考覈邦典、潤
飾皇猷、如臣樸訥少文、迂拙自用、在仁祖時、始以
直言見收、下第在神考時、復以封事獲對清光、不
能自結於一時、旋復竄投於萬里、雖謀身之不暇、
顧受任以何堪、泰壇之樽、何取溝中之斷、清廟之
瑟、誤收竈下之集、此蓋伏遇皇帝陛下、出震乘龍、
代天理物、默然思道、專意於用人、穆若守成、選衆
而求、舊憐臣一介之賤、偶爲三世之陳、遺簪以故

而見收老馬以病而復養不求其用聊廣吾仁臣雖力不迫人而誠心未泯學忘其舊而一二猶存敢不靖恭於朝側聽高宗之言政勉強以俟幾見成王之措刑

又表

越從左史擢領西垣口出命書身叅法從深念山林之迹本無富貴之心聞命若驚固辭不獲

中謝

伏念臣生本西蜀家世寒儒學以父兄爲師貧無公卿之助私有求於祿養輒自力於文詞慨然東

游無以上達際會仁祖訪求直言策語猖狂恃聖神之不諱考官怪怒惡悻直之非宜孰知牯俗之言特被愛君之詔感激恩遇遂忘死生莫酬國士之知適有私門之禍未填溝壑重迫飢寒時於道途望見神考一封朝奏夕聞召對之音衆口交攻終致南遷之患生雖不遇嘗辱顧於二宗時不見容勢殆濱於九死厄窮自致黽俛何言敢云衰病之餘復被寵光之幸此蓋伏遇太皇太后陛下母慈均覆坤德無私欲以任姒之明躬行堯舜之道

肆求多士以遺成王者耆老畢會於朝廷耕築不遺
於林莽遂令拔擢猥及空疎馮唐已衰猶願雲中
之往貢禹雖老未忘封事之勤譬如木之在山生
則荷恩而茂無所怨水之於地行則潤下而止不
敢辭臣之事君義亦如此欲報之意非言所殫文
之狀謝除戶部侍郎表
掖垣清閤奉鈔槩以媿安民部劇煩以金穀而爲
職事非素學命不獲辭中謝伏念臣起於南裔曾
未再期擢在近班訖無少補開口論事適宸心延

納之初引筆代言非書命縱橫之際竊祿而已功
何足云計日以言時亦未幾方自憂於汰去豈復
意於超昇此蓋伏遇太皇太后陛下神聖無爲靜
深照物坐閱工師之衆灼知情僞之端察臣朴愚
憐臣孤遠才雖未能以應務性則不喜於爲邪試
之劇曹冀其來効然臣觀當今戶部之政正值昔
日新法之餘召募憂於錢荒差繇患於戶少事旣
難辦法當通方尚賴聖筭之明稍寬民力之憊臣
之疎拙徒自勉強苟少緩於瘡痍亦圖報之萬一

又表

田野之姿入朝未幾侍從之貴冒寵已多方懷汰
去之憂敢有超遷之望

中謝

伏以右曹之政本專

賦役之煩近歲以來復益金倉之舊下關民力上
計邦儲朝廷議論積年於茲吏民封章繼日以上
置局未遑於成法付部要責於奏功將以適四方
之宜爲一代之典自非精練吏事通知民情何以
上副憂勤下寬疲瘵如臣淺陋殆難克堪此蓋伏
遇皇帝陛下聖貴乘時孝先述志明於因革之故

達於利病之原上覽祖宗之成規下采今昔之公
議昭然獨斷惠此小民謂臣出自賤寒或知劭農
之意性本愚拙庶無希合之情度越衆賢付以要
務臣敢不上體聖慮勉盡鄙心

謝對衣金帶表

盛服在躬衰容有耀兼金收衽綿力難勝顧視何
功叨塵重錫

中謝

伏念臣家本寒族誤點清班豈

日無衣敢自求於安燠可使束帶顧未工於語言
曾是遭逢坐蒙恩寵此蓋伏遇皇帝陛下德澤無

外足以衣被四方、禮義有餘、意將藩飾羣下、發在
笥之珍、以明重慎、易佩魚之飾、以示等威、結以會
朝、垂厲識都人之舊服、而拜舞、顧影有彼已之慚、
豈徒褒博以爲容、願盡糜捐而報德、

謝翰林學士宣召狀

成命莫回、驚使華之促召、一家竦聽、望雲闕以馳
情、實儒者之至榮、豈平生之敢望、竊以翰墨之任、
始自有唐、供奉至尊、講聞前輩、北廊奏事、有如李
絳之忠、中禁論兵、復數畢誠之智、迨我祖宗之盛、

最優文學之臣、時舉舊章、多蒙召對、頃自恭默之
後、稍虛顧問之常、方今聖德日躋、羣臣屬目、蓋將
虛前席以博問、繼夜燭而疇咨、宜得雋良、密侍燕
語、如臣草野微陋、章句拙踈、十載江湖之間、自羣
魚鳥、五遷臺省之要、永愧冠裳、敢謂乏人、遽令至
此、茲蓋伏遇皇帝陛下、天心廣大、海德并包、物無
一介之遺、意求萬目之舉、臨朝訪道、有元老之在
前、燕處清心、援衆正而自助、從容盛德、循致承平、
塵露之微、海嶽奚補、修列聖之故事、今將其時、因

聞見以納忠臣亦有志
力辭不免亟承詔旨之温
就職有時復紆使節之
重慙負之極俯伏何言竊
以法從之華禁林稱首
田漁自奮信遭遇之已艱
兄弟迭居况前後之無
幾二劉二吳號有唐之盛
事二宋二韓稱本朝之
得人或同處於一時或相
望於累歲今臣與兄軾
皆塵西掖繼入北扉曾未
三年遍經兩制才不逮
於前輩寵遂極於當年聖
主何私偏許一門之幸

愚臣自料敢齊伯氏之賢
莫爲先容獨爾幸會此
盖伏遇太皇太后陛下天
地之德含氣必生日月
之明容光咸照力判忠邪
之黨首清侍從之聯察
臣兄孤直之無他適具員
偶闕而當補棄遺簪而未
忍意同氣之可收致此空
疎亦蒙獎擢臣敢不
始終一節庶無隕於家聲
勉強百爲或有補於國
事

謝賜對衣金帶鞍馬狀

衣以旌禮錫之帶則有約束之嚴馬以代勞加之

鞍則無隕越之懼、荷國恩之深重、知聖訓之密微、服以周旋、益增愧汗、此蓋伏遇太皇太后陛下、照臨多士、祇廣德心、捐廩庫之有餘、憐臣庶之微陋、拜命茲始、曾無毫髮之勞、受賜以歸、先有蒲盈之懼、伏念臣起家寒遠、遭世熙明、才下位高、畏維鷄濡翼之誚、任重道遠、懷老驥伏櫪之心、量力自知、覽物增愧、將何以光被顯服、並驅衆賢、惟當知無不言、實亦匪以爲報。

謝除龍圖閣學士御史中丞表

視草禁中、旣極儒臣之選、專席朝右、復膺忠告之求、兼延閣之寵名、增南司之榮觀、退循淺拙、徒積兢危、中謝伏以仁聖在宥、五年于今、恭儉無爲、四方稱治、然而矯枉之過、苛吏適去、而寬弛相尋、革故之難、敝事雖除、而條綱尚紊、民貧未可、經遠吏竅難於責功、是謂守成之難、宜有厲精之實、幸臺綱之一舉措、國是於無疑、如臣才力之微、強勉何及、此蓋伏遇太皇太后陛下、德惟主善、政貴日新、閔風俗之惰媮、審詞說之忠佞、知逆耳之利、行察

遜志之多非是以度越僞賢收掇微賤然臣迂愚
之實砥礪莫加顛沛之餘衰罷日甚言之無補昔
已效於諫垣文不適時比復陳於翰苑恩深莫塞
才短奚爲惟有事君之小心每欲終身於直道折
而不屈蓋蓬蒿之自然晦而猶鳴亦雞鶩之常性
志效捐軀之報未知授命之晨拜伏在廷俯仰增
愧

謝除尚書右丞表

待罪南臺閱時空久承恩右轄量分實逾雖循墻

而固辭媿回天之無力

中謝

伏念臣衰遲晚節遭

遇聖時還朝首擢於諫垣求言終寘於臺長蓋古
人事君之難事惟忠言拂意於易危迫切至於引
裾顛危有或折檻大則死亡之不卹小則投竄而
莫畱雖伏節之心沒而後已而保身之義明者非
之臣今不然事出至幸蓋上方有道常導之使言
故下獲安心知言之無罪非徒無益而不譴抑又
與進而超遷才不逮於中流幸則過於前輩出入
數歲叅陪大猷昔所罕聞衆或驚歎此蓋伏遇太

皇太后陛下奉身有禮、體天無心、均覆中外、無戚
疎之殊、惠養黔黎、有恭儉之實、德則可紀、過寧復
聞、遂使諫諍之臣、不知激訐之懼、因緣寵遇、復享
尊榮、不貲之恩、沒齒何報、方今兵革既息、年穀稍
登、唯當上體仁心、治而弗擾、勞求哲士、守之愈堅、
庶羣后比義、以致功、則孤臣因人而成事、過此以
往、未知所裁、

生日謝表

時當生育、情方切、以懷親職、貳文昌恩、忽驚於捧

詔、廩庖致饋、門戶生光、

中謝

伏念臣夙稟厄窮、年

侵、衰、暮、偶、緣、乏、使、叨、據、近、班、未、嘗、稼、而、取、禾、則、多、
不、能、謀、而、食、肉、無、耻、醉、乏、令、德、之、美、飽、無、用、心、之、
勤、常、恐、食、浮、以、爲、身、累、敢、煩、好、賜、之、厚、曲、記、初、生、
之、期、此、盖、伏、遇、太、皇、太、后、陛、下、推、天、祿、以、養、才、因、
舊、章、而、惠、下、旨、酒、肥、粢、見、和、平、蓄、衍、之、祥、香、稻、來、
牟、皆、調、節、登、豐、之、報、顧、惟、孱、陋、坐、食、甘、腴、况、臣、少、
也、早、孤、祿、不、及、養、老、而、多、感、憂、以、終、身、賜、予、在、前、
莫、施、烏、鳥、之、微、志、顧、瞻、來、事、惟、有、忠、義、之、可、爲、藁、

爾寸心未知所報

代陳州張公安道謝批答表

伏以衰病日侵、曠官是懼、敢期恩貸、曲示撫存、中

謝伏念臣早塵侍從、晚遇聖明、犬馬之誠、本期於

竭、盡烏鳥之志、旋迫於艱難、憂患既深、志力俱耗、

比緣終制、獲覲清光、自顧衰殘之餘、力求閑散之

地、荷聖恩之未棄、付使郡以偷安、勉強支持、庶幾

補報、而自單車就道之日、舊疾緣隙而生、視事云

初、猶冀有瘳於歲月、力疾為治、未敢即訴於朝廷、

及此遷延、愈增昏眩、殆將隳撓於條教、無以表正

於吏民、眾所共知、信非矯飾、報孤誠而未達、服膺

眷以徒驚、感激之衷、固無以喻、進退之分、終所未

安、雖明主優容、舊臣而尸素之譏、安可弗畏、雖愚

臣、貪冒寵祿、而筋力之去、難以強回、苟矜察其罷

羸、實保全於終始、

又表

老病既至、昏耄及之、恩澤未移、撫存若此、感幸雖

切、啟處未寧、中謝伏惟皇帝陛下覆育萬物、體乾

坤之不遺容養羣臣猶父母之曲盡始終愛怛左右保全雖或迂疎無用之才加以羸老難任之日猶未忍棄俾獲偷安德厚恩隆感深涕隕然念臣結髮從宦出身事君遭遇聖明有犬馬自效之志酣參爵祿無山林獨往之心矯世求名既非所願要君自鬻尤不忍爲誠以病勢侵凌理難勉強伏自去歲初涖宛丘風熱交攻面目幾廢四陳誠請未賜允從貪冒寵光朋友之所譏笑隳弛條教吏民之所厭憎逮此干聞出於窘迫豈可復貪榮命不畏多言而况南都有先臣之敝廬留臺固遺老之清職在臣不爲遂廢於國亦謂無嫌病而得閑斯人情之至願退之以禮知主眷之愈隆天高聽卑得請乃已

代齊州李肅之諫議謝表

衰疲無用退避爲宜尚分邦符以便私計中謝伏念臣幼蒙基業早與簪裳遭遇先朝薦更煩使逮聖明之有作登賢俊於無方誤識鄙凡首被選擢節制西夏尹正上都用捨皆獨斷之明左右無一

人之助才微地薄寵至心驚誓堅愚忠以報天造
然自出入要地訖無絲髮之可稱驅馳莫年已覺
筋骸之不迫雖東秦之奧壤實故里之近邦顧惟
綏撫之權非復羸老之任飛章自乞倚宸眷之未
移明命俯從知聖恩之愈厚况復歷山舊治父老
猶存濮水弊廬封畛相望首丘自得戀主徒深秋
稼粗登民情稍復坐布德澤豈勞施爲惟是丘山
之恩猥被桑榆之景報效無所寢居不遑

代李諫議謝免罪表

頃者昧於周防自貽謗讟聰明坐照善惡俄分

謝

伏念臣幼服官箴惟知勤瘁老膺朝寄但守朴
忠訖無他長以報殊遇力小任重常自知其不任
勢薄地寒果大招於浮議煩言初起卒莫自明孤
迹多危已甘永棄賴聖神之不惑察誣罔之無根
不勞辯明自獲昭洗此蓋伏遇皇帝陛下天鑒在
上物無遁形坤厚兼容人獲安處知拙直之多怨
憐衰朽之易摧不見瑕疵曲全終始感幸之切涕
泗交流重念臣昔事先朝雖更煩使衰門無振起

之望莫齒絕榮華之心。自蒙選掄。遂歷華近。初無左右之助。惟恃日月之明。入領要權。出分重鎮。况復第昆之菲薄。並叨侍從之清華。蒙國厚恩。如臣有幾。未能消於謗口。實有累於知人。每自省循。謂宜廢黜。尚竊方州之寄。益明眷獎之深。敢不勉勵。疲駑。要粉身而後已。訓敕子弟。期累世以無忘。過此以還。未知所措。

代南京張公安道免陪祀表

躬饗圓丘。祇見祖廟。百辟在列。有懷舊臣。明詔及

門。許觀盛禮。顧衰骸之羸瘠。奉成命以震驚。中謝。伏念臣頃守鄉國。理極便安。但以莫年。勢難勉強。飛章請老。有負薪不逮之深憂。竊祿偷安。豈日莫思歸之本意。恐再三之上瀆。遂黽勉以逾時。然而目疾侵凌。比加昏眩。足力耗竭。殆不支持。方陛下咸秩百神。駿奔萬國。思以自天之福祿。均畀在位之臣工。惻然眷懷。未忍遺弃。而臣適丁病廢之日。懼成跛倚之尤。身滯周南。信榮觀之有命。心游魏闕。念入侍之無期。惟當望柴燎之餘煙。伏茅簷而

竊抃坐馳誠意仰企清光媿情之誅逃避無所

代張公謝免陪祀表

睿眷優隆不遺舊物老身衰病辜奉明恩未即謹
呵重加撫諭中謝伏惟皇帝陛下奉若天地祇事

祖宗罄萬國之歡心洽百禮而為奉四海來格尚
何埃於匹夫誠意旁周獨未忘於一介其為幸會
豈合固辭况臣仕歷三朝班聯二府自當勉強筋
骸之力奔走籩豆之間聽工祝之告休均在廷之
率舞而乃自陳衰瘠苟便安閑始貢私誠謂嚴誅

之莫追重迂細札識聖度之兼容雖蒲柳之質既
衰而葵藿之心未已瞻望隕越寢興不遑

南京百官賀南郊表

舉三年之盛典罄萬國之歡心釐事既終鴻恩均
被中賀伏以天地之功施而不報祖宗之德大而

難名惟有躬祀圜丘配神作主仰以答靈休之嘿
運俯以示聖孝之無窮伏惟皇帝陛下道被華夷
澤浹幽顯百神受職四海宅心盛德元功推而不
有報本反始因以教人遂緣祝嘏之餘不冒生靈

之衆幅員萬里、歡喜一詞、

南京謝頒曆表

天方發春、朝既頒朔、歲功伊始、民事有時、中謝伏
惟皇帝陛下、政先稽古、動必法天、將以正萬事於
歲先、大一統於宇內、而臣官治畱務、職在勸農、敢
不奉順典常、助宣化育、勤率吏屬、共質夔成、

張公謝南郊加恩表

元祀告成、鴻恩溥及、難在退藏之品、猶加異數之
榮、祇奉絲綸、實增慙懼、中謝伏惟皇帝陛下、竭誠

致饗、受祿自天、樂與羣臣、同霑大慶、上自股肱之
列、下同筦庫之微、嘉其顯相之勤、錄其駿奔之助、
需然大賚、夫豈無名、如臣草木餘生、桑榆莫景、顧
田廬而願逝、竊秩祿以常驚、多病支離、已無任於
陪祀、寵光霑洽、尚不間於推恩、荷德滋深、論報無
所、

代李誠之待制遺表

衰病既侵、大期將至、顧視日景、瞻戀聖時、恐死一
言、瞑目無恨、中謝伏念臣少年感慨、有志功名、晚

節遭逢，屢經驅策，搃戎西北，方朝廷旰食之秋，爲國威懷，竊將帥分憂之任，誓將勉勵，少答恩私，而施設未遑，罪戾隨至，荷聖神之普照，曾竄逐之幾時，安居里閭，浪迹漁釣，誠心自信，冀天日之尚回，歲月潛移，謂倚伏之可待，而命之弗予，冥不自知，俛仰之間，彌留已甚，伏惟皇帝陛下躬堯舜之明哲，履漢唐之緒餘，引領太平之功，側身同德之士，臣雖竊見其始，而莫究其終，興言及茲，銜痛沒地，然臣聞之，惟至誠可以格物，惟至仁可以安人，刑於萬一，則雖沒而猶生。

代陳汝羲學士南京謝表

越從散地，擢領留都，仰戴恩光，惟知慙懼，中謝伏念臣早蒙器使，屢試煩難，任重多憂，積衰成病，乞身閑冷，但求安養，於餘生絕意功名，不復干求於當世，豈謂聖恩未弃，見收桑榆，枯木再生，重沾雨露，自聞此命，莫知其由，洎獲見於清光，復親承於

聖訓盡出陶鈞之化、曾微左右之容、昔漢宣起張、
敞於亡徒、漢武用安國於梁獄、古或有是、今則無、
之嚮、非日月之照臨、不遺隙穴之微陋、則已廢之、
迹、誰肯復收、臣敢不勉勵疲駑、宣布政令、雖天地
之恩不報、而犬馬之志長存、

代張公安道乞致仕表

七十致仕、國有舊章、再三上聞、情非虛飾、
念臣早塵顯仕、才本空疎、晚依至道、心存止足、仕
方未及、亟請閑官、老既當休、卽求謝事、陛下矜憐

中謝伏

耆舊特屈典常、許帶使名、坐臨僊館、臣眷戀德澤、
難於固辭、勉強衰遲、領此深眷、空糜厚祿、已復二
年、仰愧朝廷、俯慙朋友、敢緣禮律之舊、力丐筋骸
之餘、蓋陛下欲優容老成、而臣之蒙賜已久、臣將
畏避滿溢、而陛下之流澤愈多、誠恐一朝溝壑之
虞、遂有終身負乘之耻、逮此未耄、得以自陳、伏惟
皇帝陛下成物如天、愛人以德、君臣之際、非獨以
爵祿、養爲恩、進退之間、固將以名節、始終爲意、
使臣得退伏閭里、歌詠聖時、行葦無牛羊之憂、蒲

柳免風霜之患，則私心自得，國體兼存，區區悃誠，實冀得請。

二表

老而求退，豈以爲名，病而得閑，本其至願。飛章自乞，誠意未孚，特蒙賜書，勉以就職。中謝臣聞引年去位，事君之舊章，懷祿忘歸，人臣之深戒。自昔不得謝者，在禮，雖或許之，然皆廟堂注意之臣，疆場折衝之任，邦家倚以爲重，神人賴以爲安。留之者，旣自有詞，居之者，誠亦無愧。是以禮存，權制人絕。

間言未聞，退處閑官，坐糜厚祿，竊此異數，晏然偷安。伏念臣早事三朝，晚遭興運，首被揀拔，與聞幾微。貪戀聖明，豈有窮已，徒以寵祿盈滿，懼速顛隳，筋力衰罷，理難勉強。幸緣舊典，敢固自陳，伏惟皇帝陛下，量極乾坤，德隆父母，因至誠之勤，請杜無名之誤。思念臣平生粗守廉隅，耻於僥倖，使臣今日得安分限，卽是恩私，區區寸誠，得請乃已。

三表

誠發於中，一言可信，恩加望外，再請未從。顧惟衰

朽之年久竊尊榮之寄雖蒙異眷敢以自安中謝
臣聞事君之禮少壯不敢不勉行已之義老病不
可不歸壯而不勉則失忠老而不歸則忘耻今臣
心力衰退手足支離謝事之期已逾三歲祈天之
請蓋又累年况復同列之間比多得請而去獨臣
言辭淺陋未足以回天勢力孤單中無與爲地苟
遂盤桓顧寵俯仰懷慙志不克伸沒有遺恨伏惟
皇帝陛下至誠樂善多士克生元首股肱自足名
世奔走先後未嘗乏人豈臣去留足爲輕重徒以
遺簪可念遂忘朽弊之難堪老馬尚存不知驅馳
之弗逮致之顛覆之地恐非愛惜之宜故寵臣以
尊名不若使臣得全廉耻之爲貴厚臣以重祿不
若使臣得守分限之爲安凡厥保全之餘斯皆聖
明之賜力陳危懇尚冀必從

代張公謝致仕表

引年辭位忘三請之頻煩念舊推恩兼異數之重
復不替使名之重仍兼官職之崇身喜歸休心慙
誤寵國有成命禮不敢辭中謝伏念臣奮自諸生

薦歷顯仕、出入中外、凡經四十餘年、事業空疎、未聞一二可紀、量才無用、早絕意於功名、聞道有年、久甘心於閑退、徒以夙事累聖、晚遇昌期、雖復已衰、未忍亟去、逮此筋骸之俱廢、自知驅策之難堪、瀝懇上聞、輒難蒙聽、皇明委照、私欲無違、復緣出震之初、與聞馮几之命、曲加恩禮、度越典常、此蓋伏遇皇帝陛下、義不忘勞、仁先貴老、待疲馬以芻粟之厚、聊盡其年、均枯木以雨露之恩、豈責之報、使得優游卒歲、安樂延齡、惠澤至深、反側爲愧、雖老身已矣、將遂志於山林、而物性自然、終傾心於葵藿。

代滕達道龍圖蘇州謝上表

近從隣郡、移領鄉邦、舟楫之勞、曾無幾日、里閭之舊、足慰平生。中謝伏念臣家世寒微、學術疎淺、介特無援、歷事三朝、繾綣愚忠、粗守一節、方先帝臨御之始、寔羣臣綜覈之秋、拙直之心、偶蒙委照、幾微之議、每輒與聞、知無不言、徒自竭於忠孝、直故多怨、遂寢結於憎嫌、恩遇一移、流落十載、雖欲自

安於散地、然猶橫被以惡名、投畀遐方、要令沒齒、竊意網羅之莫脫、豈知天日之自明、吳興之除、聖意可見、幸疑謗之已釋、雖老死、其何求、敢冀憂恩、復遷善地、此蓋伏遇皇帝陛下、孝思天至、聖德日躋、憐孤迹之多艱、傷舊物之久棄、特推鴻造、存養餘齡、臣老病相仍、羈危多感、勤卹民物、敢忘委寄之深、迎勞往還、已覺筋骸之憊、葵藿之心、徒切桑榆之報、何時

又表

地本鄉閭、人情所樂、物多魚稻、衰病以安、祇見吏民布宣德澤、中謝伏惟太皇太后陛下、坤儀正大、母德慈仁、照知四海之艱難、洞鑒羣臣之情僞、不遺疎逖、均被優恩、臣早事三朝、誤知先帝、初睹變更之議、每陳安靖之謀、言拙計疎、怨多援寡、始求補外、本欲安身、不圖寵幸之心、未快憎嫌之素、遂因疑事、加以惡名、流落十年、必致灰亡之地、竄投三郡、益加遠小之鄉、賴聖神之至明、察愚直之無過、獨排衆謗、移領吳興、危迹再安、孤根復植、逮茲

新命不覺涕零、惟天地之鴻私、顧草木之何報、東南少事、深慙素食之恩、江海坐馳、私有自憐之意、
賀毆陽少師致仕啟

伏審累章得謝、故邑榮歸、位冠東宮、寵兼舊職、高風所振、清議愈隆、伏惟致政、觀文少師、道德在人、術學蓋世、早遊侍從、蔚爲議論之宗、晚入廟堂、隱然衆庶之望、屬三朝之終始、更萬變之勤勞、臨事而安、莫測弛張之用、釋位旣久、始知靜鎮之功、仰成績之不刊、信後來之難繼、薦歷三鎮、始終一心、

知無不言、曾中外而易意、老而彌壯、信賢達之過人、衆皆以力事君、公獨以道自任、仕以其力者、力衰而後去、進以其道者、道高則難留、故七十致仕、在禮則然而六一自名、此志久矣、築室清潁、琴書足以忘憂、遺名四方、珪組蓋已外物、誰與治國、能就問以質疑、惟是門人尚不拒其來學、

賀致政曾太傅啟

伏審得謝明廷、進兼異數、首被袞衣之錫、仍因旄節之崇、終始恩榮、中外慶慰、伏惟致政太傅侍中

舊德隆重、元勳著明、輔相三朝、純固一節、良士在位、不求旅力之功、尚父雖衰、猶荷鷹揚之託、西鄙無事、中宸思賢、繼陳止足之誠、自求清靜之樂、付青簡以遺事、追赤松而並遊、大節凜然、四方仰止、矧十載廟堂之舊、多一時几杖之賢、年德最先、命秩尤峻、出同憂患、措國步於安寧、歸共優游、播清風於長久、

賀朝相州啟

伏審懇辭留務、歸守鄉邦、歛藏爲國之方、勉就還

家之樂、進退有裕、卷舒適宜、伏惟某官、才大難名、功成不處、方三朝之終始、更萬變之勤勞、抗大節於羣疑、擅元勳於不朽、楚國已定、葉公返其舊封、唐室多虞、裴度久而在外、遺功名於簡策、樂民社於方州、施無不宜、信處心之有道、衆猶願治、懷舊德、以徒勞、某夙荷獎知、實倍歡慰、限以官守、阻詣門庭、

賀河陽文侍中啟

伏審力辭樞務、得請名邦、恩禮便蕃、中外慶慰、伏

惟判府司徒侍中輔相三世始終一心器業崇深
不言而四方自服道德高妙無爲而庶務以成此
朝廷所以遲遲於均佚之書而士民所以睠睠於
保釐之命顧惟出處之義實繫功名之終留侯志
於赤松晉公安於綠野油然自得夫豈不懷矧惟
三城密邇全洛政獨止於民社樂有助於林泉道
大難名信後來之莫繼民猶思治恐久安之未遑
謝張公安道啟

東坡集亦載之但東坡不曾
在留都與安道相與宜入此

伏以少年遊學方成都樂職之秋壯歲效官復淮

陽卧治之日矧留都之清淨眷幕府之優閑再辱
辟書重收孤迹哀憐廢棄之久誰復肯然綢繆罇
俎之歡亦非偶爾伏惟留守宣徽太尉才高一世
望重累朝體河岳之兼容納涓埃而不間衣食有
奉已寬盡室之憂道德照人况復終身之幸其爲
感激難盡敷陳

賀趙少保啟

伏審得謝明廷榮歸故里叅東宮之羽翼增南國
之光華搢紳竦觀貪懦知愧伏惟致政少保德侔

金玉節貫冰霜早入諫垣凜乎蹇諤之足畏晚陪
國論溫然忠厚之可依逮此分憂所至稱治因俗
爲政無寬猛之常與民息肩有清靜之化士夫倚
以爲重邦家仰以爲安而止足之心早已自許再
三之請久而後從退居水石之鄉自放簪裳之外
優游空寂有以知萬物之輕呼吸清華有以期百
年之壽激揚頽俗師表後生卓然先覺之風坐致
不言之益某因緣未契誤辱見知舊德不留雖同
海內之公怨高節愈劭私喜哲人之克終欣慰之

多敷染難盡

賀文太師致仕啟

伏審得謝中朝歸老西洛位極師保望隆古今止
足之風中外所嘆伏惟致政太師躬獲臯之偉業
兼方召之壯猷翼亮三朝始終一節百辟共傳於
遺事四夷想聞於風聲民恃以安士思爲用尚父
雖老而鷹揚未衰猛虎在山而藜藿不採况復坐
而論道本無黃髮之嫌出以濟時何負赤松之約
而能去如脫屣名重太山近世以來一人而已方

將翱翔嵩少之下、徘徊伊洛之間、身寄白雲堂、開
綠野、釋鼎鍾之重負、收竹帛之餘光、雖使圖之丹
青、奉以尸祝、衆之所願、誰復間然、某蚤以空疎、誤
辱知獎、嘗欲借潤於河海、庶幾自効於錙銖、而蹇
拙多艱、漂流歷歲、誓將歸掃墳墓、絕意功名、罪籍
得除、或成過洛之幸、舊恩未棄、尚許登門之遊、一
聽話言、永畢微願、猶能作爲歌頌、傳示無窮、俯慰
平生仰答恩遇、瞻望台屏、不勝區區、謹奉啟陳賀
除中書舍人謝執政啟

謫宦江湖、歲月已久、置身臺省、志氣未安、繼登翰
墨之場、勉出絲綸之語、辭而不獲、處之益驚、凡物
之生、小大異稱、惟人所處、閑劇有宜、狙猿無事於
冠裳、爰居不樂於鐘鼓、操之則慄、舍之則安、是以
造物者聽其自然、而用人者貴於因任、然後才得
其適性、無所傷、某少而讀書、中頗喜事、旣挾策以
干世、誠妄意於濟時、奏牘之多、旣比狂於方朔、流
涕之切、亦效直於賈生、比困幽憂、始聞大道、汎若
虛舟之獨往、寂如死灰之不然、久於索居、遂以無

用以謂良冶之砥石不能發無刃之金大匠之斧斤不能器不才之木自放而已蓋將終焉豈意大明之繼升廣收諸賢以自助驥駟之乘而罷駑與焉榷柟之林而樗櫟在是橫蒙見錄漫不自知此蓋伏遇某官道大難名才高不器深念格天之業本由得士之功致二老於幽遐罄九官之汲引下迨微陋或蒙甄收曾是放棄之餘輒參侍從之列朝衣肉食雖懷歸而未由濡足纓冠顧所居之當爾冀斯民之大定幸四國之無虞碌碌何功猶或一書於竹帛堂堂偉績尚能悉載於聲詩過此以還未知所措

張聖民修撰謝二府啟

待罪海壖方虞於曠敗分憂畿外尤荷於陶鈞祇見吏民布宣條詔累歲豐稔畧無罷人積雨開明粗有秋稼方郡邑之無事顧庸懦於何爲某早從宦遊舊悅圖史旋承乏於劇職勉從事者歷年心迷薄領之煩力殫錢穀之計逮茲出守之地復修舊學之餘政事稍閒初心自得曾何幸會獲此便

安此蓋伏遇某官道德濟時、宇量包世、燮和中外、耻一物之未寧、容養賢愚、思羣材之各遂、顧鄙儒之無狀、竊近輔以偷安、雖荷德之深、無忘於瞻仰、而營職之外、何補於涓埃、

李諫議謝二府啟

某爲性甚愚、篤於自信、與人無忌、拙於周旋、頃者得遇監司、造爲浮謗、浼塵上聽、紛然罪戾之多、傳播四方、重爲衰老之愧、飛章自理、爲計已踈、雖循省之無瑕、顧吹求之已密、恃照臨於皎日、信俯仰

於平衡、不竢辯明、坐獲昭洗、枯根再生於時雨、敗舟獲濟於驚瀾、名節旣全、歿生爲幸、此蓋伏遇某官特大鈞而播物、奮至鑒以臨人、定妍醜於須臾、無施巧僞、憐衰罷之易毀、曲爲保全、德厚恩隆、感深涕隕、某老病旣久、思求歸而未能、荷戴雖多、恐圖報之無日、激切之至、敷述奚殫、

宋陸務觀表啟

會慶節賀表

瑞慶節賀表

皇太子受冊賀表

賀明堂表

謝明堂赦表

謝赦表

謝賜曆日表二首

福建到任謝表

務觀

江西到任謝表

嚴州到任謝表

除寶謨閣待制謝表

落職謝表

送曦授首稱賀表

賀皇太子受冊牋

送曦授首賀太皇太后牋

丞相率文武百僚賀皇帝冬至表

丞相率文武百僚賀壽皇正旦表

謝曾侍郎啟

賀黃樞密啟

謝賜出身啟

上陳安撫啟

上二府乞宮祠啟

通判夔州謝政府啟

上王宣撫啟

謝夔路監司列薦啟

與趙都大啟

與成都張閣老啟

荅勾蘭州啟

與李運使啟

賀葉樞密啟

賀龔叅政啟

荅南劍守林少卿啟

上趙叅政啟

江西到任謝史丞相啟

謝王樞使啟

謝臺諫啟

荅本路郡守啟

賀葛正言啟

賀周叅政啟

賀謝樞密啟

賀禮部鄭侍郎啟

上丞相叅政乞宮觀啟

知嚴州謝王丞相啟

謝黃叅政啟

謝施叅政啟

謝臺諫啟

王丞相啟

謝葛給事啟

官諫啟

謝梁右相啟

諫啟

謝周樞密啟

謝臺諫啟

啟

與汪郎中啟

賀賈大諫啟

啟

賀周丞相啟

除直文華閣謝丞相啟

謝費樞密啟

陶石簣先生批選唐宋六家表啟

宋山陰陸游務觀

會慶節賀表

有王者興，爰啟丕平之運，使聖人壽，敢忘胥戴之

誠

中賀

恭惟皇帝陛下，蕩乎無名，建其有極，干戈

載戢，恩加遼碣之區，囹圄一空，治格成康之上，歛
時百福，享國萬年，臣迹滯遐陬，心馳魏闕，紀虹渚
電樞之慶，莫厠諸儒，演龍宮藥笈之文，徒修故事，

瑞慶節賀表

務觀全

虹流電繞、適當聖作之辰、鼇抃嵩呼、共效壽祺之
祝、敢傾丹悃、仰扣睿聰、中賀恭惟皇帝陛下、德當
乾符、躬有聖瑞、東漸西被、偉聲教之混同、上際下
蟠、極仁恩之滌漉、帝生商而立子民、戴舜以同心、
歷考前聞、孰逾盛際、臣生逢千載、仕歷四朝、嶽貢
川珍、猥預駿奔之末、鳶飛魚躍、永依洪造之中、

皇太子受冊賀表

明詔建儲、永爲宗社之本、正衙發策、顯答神祇之
心、國勢奠安、輿情闔懌、中賀恭惟皇帝陛下、若稽

古訓、駿惠先猷、壽考億年、誕膺不蔽之福、本支萬
世、坐擁無疆之休、存心養性、以事天、修身齊家而
治國、迨舉有邦之慶、益昭知子之明、臣跡遠周行、
心馳魏闕、命太史卜日之吉、徒聞播告之傳、遣上
公持節以行、莫預觀瞻之盛、儻未辭於聖代、尚自
力於聲詩、

賀明堂表

農扈屢豐、協氣方流於綿宇、合宮大享、曠儀遂舉
於中天、驛置星馳、嵩呼雷動、伏以聖神在御、柝報

聞行肆嚴長至之祠一舉上辛之典惟茲宗社實
在季秋既得萬國之驩心宜罄一精之嘉薦中賀
恭惟皇帝陛下範圍元化斧藻太平采皇祐之舊
章茂建中和之極稽紹興之新制用適古今之宜
上帝顧歆殊休叢委臣官縻遐徼心繫明廷考漢
家汶上之圖嘆莫陪於潤色繼周頌我將之作尚
自力於形容

謝明堂赦表

明堂總章舉曠儀於路寢鈞陳羽衛敷大號於端

闡德協穹祇春回海縣中謝恭惟皇帝陛下道繩
祖武政酌民言乾文仰法於房心肇稱鉅典解澤
默符於雷雨一洗衆愆統和天人空虛囹圄臣適
乘使傳遠在遐陬奉五百里之驛書徒深鼇抃上
千萬年之聖壽莫綴鳧趨

謝赦表

宣布仁恩發揚孝治觀人心之鼓舞知天意之協
從中謝恭惟皇帝陛下躬舜禹之資履曾閔之行
損又損而至道老吾老以及人一日三朝雖極寧

親之大養、四方萬里、尚憂庶獄之亡、辜內廣惠心、
旁流霈澤、雨露所被、囹圄一空、臣適以守藩、恭聞
孚號、雖與民欣戴、如瞻咫尺之天、然受命禱祈、實
勞方寸之地、

謝賜曆日表

春秋以王而次春、丕顯體元之妙、閏月定時而成、
歲適當頒曆之辰、治象一新、歡聲四溢、中謝恭惟
皇帝陛下、道兼倫制、化被堪輿、念王業之艱難、每
急農桑之務、察天心之仁愛、尤深水旱之憂、誠意

既孚嘉生、並應呼嵩、高之萬歲、幸覩昌期、陳泰階
之六符、不勝大願、

又表

詔班新曆、雖舉彝章、地近清都、獨先下拜、恩光旁
燭、小已知榮、中謝臣聞堯授人時、實前民用、漢得

天統、克協帝心、方當重熙累洽之盛時、宜謹體元
居正之大典、恭惟皇帝陛下、凝圖丕赫、受命溥將、
齊七政於璿璣、昭示太平之象、調四時之玉燭、用
待來歲之宜、爰勅有司、以幸天下、臣偶叨牧養、獲

與布宜職思其憂勸課誓殫於綿力年運而往功名更感於初心

福建到任謝表

咸造在廷甫遂朝宗之願奉使有指遽叨臨遣之榮大造難名餘生曷報中謝伏念臣么然薄命起自窮閭隅以元祐之黨家獲與紹興之朝士真人有作景運方開適當宁歎息人才之實難顧一時豪傑號召而未至首蒙引對面錫殊科遭逢稀闊之知聳動邇遐之聽豈期蹇薄旋困沉綿卒繫全

度之恩俾獲退藏之分侵尋半世轉徙兩川三爲別乘之行再忝專城之寄五十之年已過非復壯心八千之路來歸恍如昨夢敷陳淺拙應對參差惟遣黜之是宜豈超遷之敢望此蓋伏遇皇帝陛下道兼倫制澤被堪輿念臣留落有年尚未除於狂態憐臣馳驅無地空竊抱於愚忠顧雖末路之孤蹤猶玷外臺之高選臣謹當力思守道深戒瘵官禮樂遠有光華旣大踰於素望靖共好是正直庶少答於鴻私

江西到任謝表

疏恩趣召、靡待一人之言、改命遣行、猶備四方之
使、丹衷欲叙、雪涕先傾、中謝伏念臣稟資迂愚、立
身羈藐、偶竊犁鉏之餘暇、妄窺述作之淵源、纍然
自力於簡編、老之將至、過矣見稱於流輩、轉而上
聞、頃入對於燕朝、實親承於睿獎、然而異恩賜第、
弗由場屋之選、掄特旨造廷、非出公卿之論、薦已
分、亟投於閑散、豈期重累於生成、此蓋伏遇皇帝
陛下立賢無方、用人唯已、一洗拘攣之積弊、廣收

魁傑之遺才、施及妄庸、亦蒙省錄、甫停追詔、還畀
使壇、凡曰自結於上、知皆俾無蹈於後宮、海嶽之
內、纖塵墜露、何所用之、父母之愛、幼子童孫、茂以
加此、驅馳入境、感懼填膺、重念臣樸學守株、孤身
弔影、素乏蚍蜉螳子之助、孰爲輪囷蟠木之容、愴
餘日之安歸、抱微誠而永歎、方天子建中和之極、
用告成功、雖史近卜祝之間、亦思自效、尚憑長育、
不遂棄捐、所願預草漢家檢玉之文、未敢遽同堯
民擊壤之作、剝肝自訴、伏鑽何辭、疾痛飢寒、仰而

呼天誓靡求於世俗齋戒沐浴可以事帝冀終望於清光

嚴州到任謝表

穿延和之細伏、面咫尺天、佩新定之左符、秩二千石、叨塵過分、感懼交懷、中謝臣聞明主恩深、書生命薄、唐帝之知李白、一官不及於生前、漢皇之念相如、遺橐徒求於身後、况如臣輩、莫望昔人、猥緣一技之卑、嘗綴百僚之末、雖簪笏以違於昕謁、乃姓名猶在於淵衷、乘傳來歸、兩奉召還之旨、懷章

欲上亟蒙趣對之榮、親降玉音、俯憐雪鬢、勞其久別、盖寵嘉近侍之所宜、勉以屬文、實臨遣守臣之未有、茲盖伏遇皇帝陛下、睿謨冠古、英斷如神、肆筆成書、千載獨高於聖學、刺經作制、諸儒絕企於清光、以臣夙被化於明時、憐臣未廢書於晚歲、將激昂其素志、故闕畧於徃愆、臣敢不戴使愚使過之恩、念有社有民之寄、憇棠陰而聽訟、期無墜於家聲、及瓜戍而代歸、尚少酬於君賜

除寶謨閣待制謝表

陪衆雋以登瀛、已慙薄陋、扈六飛而上雍、遽踐高
華、恩重命輕、感深涕賈、中謝伏念臣材非異稟、家
本至寒、蒼雅遺書、守先臣之孤學、莊騷竒作、誦諸
老之舊聞、竊慕隱居求志之心、尤耻譁世取名之
事、年運而往、道阻且長、任止爲貧、適遇四朝之盛、
際老猶不死、遂爲六聖之遺民、豈期垂盡之時、更
被非常之遇、置之儒館、命以信書、特寬尸素之重、
誅不待汗青、而加賞茲、蓋伏遇皇帝陛下、道兼倫
制、學備誠明、體穹穹厚厚之仁、躋蕩蕩巍巍之治、

風行雷動、號令靡隔、於幽遐魚躍鳶飛、人材不遺
於䟽賤、雖耄期之已迫、尚覆育之愈深、臣敢不口
誦訓詞、心銘德澤、入預甘泉之筆橐、儻効微勞、歸
尋杜曲之桑麻、終祈洪造、

落職謝表

叨榮罪大、念舊恩深、僅鐫筆橐之華、猶保桑榆之
景、仰慙鴻造、下愧公言、中謝伏念臣本出故家、初
無他技、每自求於遠宦、豈有意於虛名、命之多難、
動輒爲累、強起僅餘於數月、退歸又閱於六年、齒

豁頭童心。勦形瘵。叫闈請命。蒙恩久許。其乞骸飾。巾待終視。世已同於逆旅。敢謂寬平之邦。憲尚令。漸盡於里居。此蓋伏遇皇帝陛下。勵精大猷。惠養遺老。念臣生當全盛。被六聖之涵濡。憐臣仕遇中興。荷五宗之識拔。雖名薄責益。示殊私。臣敢不祇誦訓詞。痛懲宿負。尸居餘氣。永無再瞻軒陛之期。老生常談。莫叙仰戴丘山之意。

逆曦授首稱賀表

天無私覆。實均父母之仁。邦有大刑。爰下風雷之

令。英斷若神明之速。成功無畧刻之淹。氛祲澄清。

頌聲洋溢。臣

中賀

伏以高皇有作。王室中興。方犬

戎窺蜀以憑陵。賴驍將奮身而守衛。念功無已。分閭相承。仰累朝寵數之非常。雖舉族糜捐而易報。豈圖小醜。自取誅夷。僭服自如。改元無憚。受封割地。已北通獯鬻之庭。置戍奪符。欲東扼瞿唐之險。罪不勝於擢髮。誅寧貸於闔門。肆推曠蕩之恩。實自聖神之造。恭惟皇帝陛下。德配天地。功光祖宗。覽圖籍而動容。每念兩京之未復。奉廟祧而霑涕。

不、忘、九、世、之、深、讐、蠢、茲、雛、卵、之、微、自、投、鼎、鑊、之、地、
人、情、共、憤、天、討、遂、加、菹、醢、以、賜、諸、侯、雖、特、寬、於、漢、
法、頭、顱、之、行、萬、里、已、大、震、於、戎、心、遙、知、羣、醜、宵、遁、
之、餘、無、復、並、塞、秋、防、之、警、臣、身、歸、南、陌、名、寓、西、清、
馳、驛、四、傳、徒、快、鯨、鯢、之、戮、造、朝、旅、賀、莫、趨、鵷、鷺、之、
班、

賀皇太子受冊牋

父、慈、子、孝、集、大、慶、於、我、家、日、吉、時、良、發、正、衙、之、顯、
冊、國、勢、重、於、九、鼎、驪、聲、達、於、四、方、
中賀 恭惟皇太

子、殿、下、秉、德、淳、明、宅、心、虛、靜、英、姿、達、識、事、洞、照、於、
幾、先、強、記、博、文、言、必、稽、於、古、訓、躬、守、累、朝、仁、恕、之、
訓、日、侍、兩、宮、睟、穆、之、顏、歷、考、古、初、實、爲、創、見、某、夙、
叨、四、品、垂、及、九、齡、爲、國、老、農、莫、遙、濟、濟、鵷、鷺、之、列、
逢、時、盛、典、尚、懷、區、區、犬、馬、之、心、

逆曦授首賀太皇太后牋

叛、國、干、紀、敢、萌、負、固、之、心、密、詔、行、誅、不、待、崇、朝、之、
久、慶、關、宗、社、喜、溢、宮、庭、臣、
中賀 伏以參井之墟古
今、重、地、方、高、帝、東、巡、之、始、實、羣、胡、南、牧、之、秋、爰、有、

驍雄服勞疆圉。惟列聖念功之意。每示優隆。度故
臣誓報之心。豈有窮已。蠢茲微孽。亦荷異恩。入居
宿衛之聯。出任師干之寄。天所助者。順乃懷悖。逆
之圖。人不食其餘。自掇殲夷之譴。尚全遺族。實出
上恩。恭惟太皇太后陛下。坤厚資生。母儀燕翼。每
道先朝之家法。助成聖主之性仁。慰在天之靈。故
誅其孥。而無赦。廣及物之澤。故宥其族。而弗疑。臣
久屏窮閭。猶叨近侍。用三有宅。欣逢湯德之寬。於
萬斯年。莫預堯封之祝。

丞相率文武百僚賀皇帝冬至表

一之日以授時黃鍾合律萬斯年而介福赤伏膺
符慶集邦家驩騰海宇

中賀

恭惟皇帝陛下仁同

乾覆道協時乘旦復旦以重光邦圖有永新又新
而不倦帝德難名默觀造化之机自得財成之妙
清心省事成歸根反本之功任賢去邪體陽進陰
消之象臣等幸逢熙運獲邇威顏和氣先回豈待
葭灰之應豐年已兆敢陳雲物之占

丞相率文武百僚賀壽皇正旦表

道妙混成太極著兩儀之本天端更始三朝受萬
國之歸慶集有邦驩騰率土中賀恭惟至尊壽皇
聖帝陛下濬哲稽古清明在躬握乾符闡坤珍難
名蕩蕩之德系唐統接漢緒誕受丕丕之基以海
宇之富而蹈巢由高世之風以父子之親而行堯
舜曠代之事迨此獻歲發春之日實繫考圖數貢
之時史冊增華措紳太息臣等幸承睿獎獲覩昌
期鵷行畢集於大庭共喜威顏之近龍袞恪趨於
小次更知榮養之尊

謝曾侍郎啟

結綬彈冠既過尋常之望懷鈔抱槩獲輸尺寸之
長永言外翼之恩忽焉涕淚之集伏念某讀書有
限與世無緣吟梁甫於草廬倒天吳於短褐借助
於金張許史既家世之不爲從事於米鹽薄書又
生平之未學一昨奔馳薄宦流落殊方上風頓異
於中州宿疾遽侵於壯歲食有竈蚶之異醫無鍼
石之良凜然懷性命之憂不暇計飢寒之迫毀車
殺馬逝從此以徑歸賣劍買牛分餘生之永已豈

謂、始、終、之、不、棄、俯、憐、緩、急、之、誰、投、出、泥、塗、而、濯、清、
風、披、泉、扇、而、起、白、骨、稱、於、天、下、曰、知、已、顧、豈、在、於、
他、門、雖、使、古、人、而、復、生、亦、難、勝、於、此、賜、茲、蓋、伏、遇、
某、官、盡、心、知、性、惟、道、集、虛、氣、塞、天、地、之、間、辭、編、詩、
書、之、策、授、業、解、惑、務、廣、先、師、之、傳、揚、善、進、賢、用、爲、
聖、主、之、報、廣、則、或、至、於、雜、恕、則、不、責、其、全、是、致、庸、
虛、亦、汗、題、品、然、而、仰、觀、明、公、之、勇、退、每、蹈、前、哲、之、
難、能、超、軼、絕、塵、優、游、卒、歲、雖、賢、愚、之、甚、遠、顧、師、慕、
之、敢、忘、誓、當、力、戒、它、岐、益、堅、素、守、禍、福、有、命、豈、其、
或、置、於、胃、中、名、節、儻、全、是、則、不、辱、於、門、下、終、期、末、
路、可、復、斯、言、

賀黃樞密啟

恭、審、顯、膺、制、書、進、貳、樞、府、威、望、之、重、宗、社、所、憑、天、
其、相、之、圖、日、以、冀、中、興、之、治、竊、以、朝、廷、之、政、
屬、在、帷、幄、之、臣、方、無、事、之、時、雍、容、坐、談、則、夫、人、而、
皆、可、應、一、旦、之、變、酬、酢、曲、當、非、有、道、者、不、能、歷、觀、
昔、人、蓋、鮮、全、美、王、導、之、襟、量、而、學、不、至、德、裕、之、術、
畧、而、器、未、優、故、晉、卒、安、於、江、東、唐、莫、追、於、正、觀、有、

志之士太息於斯、恭惟某官心正意誠、任重道遠、躬卓行於苟且、自恕之俗、推絕學於散缺、不全之經、凜然一家之言、發乎千載之閱、加之博極墳史、得興亡治亂之由、綜練典章、識沿革始終之際、氣足以懾姦慝、明足以察忽微、其在掖垣、惟公議是達、其侍經幄、惟王道是陳、果由師錫之同、入總本兵之寄、然而方時多故、爲計實難、夷狄鴟張、肆猖狂不遜之語、邊障狼顧、懷震擾弗寧之心、東有淮江之衝、西有楚蜀之塞、降附踵至、人心雖歸、而強

弱尚殊、踊躍請行、士氣雖揚、而勝負未決、堅壁保境、則曷慰後來之望、闢國復土、則又有兵連之虞、竊惟明公素已處此、某頃聯官屬、獲侍燕居、每妄發其慙愚、輒誤蒙於許可、雖輟食竊憂於謀、夏而荷戈、莫効於防、秋敢誓糜捐、以待驅策、

謝賜出身啟

明廷錫對、晨趨甲帳之嚴、親札疏恩、暮拜丙科之寵、感深涕墮、媿極汗流、竊以國家取士之方、固非一路、學者進身之始、又惡多岐、故祖宗非私於俊

造之科而公卿罕出於選舉之外至膺特詔尤號
異人頌詩足以配絃歌則梅堯臣出於皇祐文章
足以垂竹帛則王安國起於熙寧或友朋借譽而
不以為私或兄弟當塗而莫之或議厥繇至當故
可無慙如某者才樸拙而無竒學迂疎而寡要自
悲薄命久擯名場敢謂一朝遂叨賜第門外之袍
立鵠恍記少時詔中之字如鴉猶疑夢事茲蓋伏
惟某官股肱王室領袖儒林以謂設一日之羅蓋
非得爵之道至於售千金之骨抑明市駿之心寧
借妄庸以風四方不忍拘攣而廢一士某敢不討
尋舊學企慕前修儒者之弊勞而無功誓少求於
實效聖君所行卽是故事將時得於遺材敢仰賀
公道之興非獨叙私情之謝

上陳安撫啟

佐州北固麥甫及於再嘗易地南昌瓜未期而先
代雖千里困道途之役幸一官在部封之中伏念
某學本小知器非遠用昨侵尋於薄宦偶比數於
諸公除目雖頻不出百僚之底駭機忽發首居一

網之中、謂宜永放於窮閭、猶得出丞於近郡、復緣私請、更冒明恩、超超空凡馬之羣、實非能辦、默默反屠羊之肆、其又奚言、僥倖非常、慚惶莫諭、恭惟某官、英姿山立、大度淵渟、不媿於天、而不作於人、卓矣、誠身之學、有考於前、而有驗於後、大哉、致主之言、顧自信之甚明、雖不容而何病、使事有指、姑少試於澄清、治其畢張、要終煩於經濟、某小舟已具、漫刺將前、雖多病、懷歸徒費、噓枯之力、然至仁逮下、實寬束濕之憂、

上二府乞官祠啟

白首而困、下吏久安、佐郡之卑、黃冠而歸、故鄉輒冀奉祠之樂、恃廊廟并容之度、忘江湖遠屏之蹤、敬布忱誠、仰干造化、伏念某、讀書有限、與世無緣、歲月供簿、領之勞、衣食奪山林之志、拊心自悼、顧影知慚、儻少逭於飢寒、誓永投於閑散、頃以牽聯而少進、惕然恐懼、而弗寧、亟辭振鷺之廷、徑返屠羊之肆、優游食足、敢陳楚些之窮、衰疾土思、但抱越吟之苦、伏望某官、因材授任、與物爲春、察其愚

無所能乏。細木侏儒之用。哀其窮。不自活。捐太倉。紅腐之餘。特假閑官。使安晚節。棄實憲如孤雛。死鼠寧足矜憐。譬杜牧以白骨遊。鬼少加恤。養某謹當收身末路。沒齒窮山。玩仙聖之微言。樂唐虞之盛化。杜門掃軌。固莫望於功名。却粒茹芝。冀粗成於道術。雖無以報。猶不辱知。

通判夔州謝政府啟

貧不自支。食粥已論於數月。幸非望及。彈冠忽佐於名州。孰知罪戾之餘。猶在憫憐之數。啣恩曷報。

撫已知慙。伏念某少也畸人。長而獨學。好莊周齊物之說。樂以忘憂。讀嵇康養生之篇。慨然有志。秉心不固。涉世寢深。兒女忽其滿前。藜藿至於併日。屢求吏隱。冀代躬耕。亦嘗辱記其姓名。固欲稍畀之衣食。費元化密移之力。不知幾何。悼孤生一飽之艱。迺至如此。卒叨薄祿。實謂殊私。此蓋伏遇某官黼黻帝猷。權衡國論。開公孫之東閣。共欣多士之彙。征解晏子之左駟。不忍一夫之獨廢。召來和氣。力致隆平。惟是魚復之故城。雖號烏蠻之絕塞。

乃如別駕實類閑官况惇惇方起於徒中宜凜凜
過虞於意外固勞敢視馬曹而不問亦每當占紙
尾而謹書豈有功勞能自表見念昔並遊於英俊
頗嘗抒思於文辭既嗟氣力之甚卑復恨見聞之
不廣今將窮江湖萬里之險歷吳楚舊都之雄山
巔水涯極詭異之觀廢宮故墟弔興廢之迹動心
忍性庶幾或進於分毫娛憂紆悲亦嘗勉見於言
語儻粗傳於後世猶少答於深知過此以還未知
所措

上王宣撫啟

薄命遭回阻並遊於簪履丹誠精確猶結戀於門
墻敢辭蹈萬死於不測之途所冀明寸心於受知
之地伏念某稟資凡陋承學空疎雖肝膽輪困常
慕昔賢之大節廼齒牙零落猶爲天下之窮人撫
劔悲歌臨書浩歎每感歲時之易失不知涕泗之
橫流昨屬元臣暫臨西鄙獲廁油幕衆賢之後實
輕玉關萬里之行奮厲欲前駑馬方思於十駕羈
窮未慙沉舟又閱於千帆傷弱植之易搖悼鴻鈞

之難報、心危欲折、髮白無餘、如輸勞効、命之有期、顧隕首、宥胷、而何憾、茲從剡曲、來次夔關、雖未覘於光躔、已少紆於志願、此蓋伏遇某官、應期降命、生德自天、器宇魁閎、鍾太行黃河溫厚之氣、文章鉅麗、有慶曆嘉祐太平之風、取人不棄於小材、論事每全於大體、念茲虛薄、奚足矜憐、然遭遇異知、業已被展前之薦、使走趨遠郡、豈不爲門下之差、儻回曩昔之恩、俾叨分寸之進、窮子見父、可量悲喜之懷、白骨成人、盡出生全之賜、過此以往、未知

所裁

謝夔路監司列薦啟

意象纍然、揣分已安、於下吏寵光異甚、交章遽上於公車、莫測何由、但知難稱、伏念某、久嬰瞽病、見謂散材、偶從諸老先生之遊、粗得前言往行之畧、可容今事、少年誤竊於虛名、力洗陳言、晚節方慚於大學、一來楚峽、再閱王春、惟體重於藩方、故職均於曹掾、占名惟謹、幸逃有蟹之嘲、竊祿甚微、屢起無魚之嘆、豈期僉論驟及、孤蹤遂令枯槁之餘、

漸有敷榮之望。此蓋伏遇某官器亟魁磊議極崇。欲雖持秋霜夏日之嚴。每廓滄海洪河之量大。呼相和或容醉吏之狂。重聽何傷曲恕。聾丞之老。雖深知其無用。亦並采而不遺。某敢不強恕求仁。質直好義。庶幾夙夜。或免小人之歸。猶有鬼神尚圖國士之報。

與趙都大啟

游被臺移。攝陪幕辯。方刻章而俟報。輒懷檄以徑前。迫於竒窮。作此頑鈍。冒世俗之所憫笑。賴門下

以爲依歸。伏念某下愚無知。大惑不解。罪宜永斥。

朝蹟者十年。身困遠遊。車轍幾環於萬里。比

官巴峽。旋客塞垣。歲月不知其再周。形影相顧而自悼。支離病骨。無毀而亦消。羈旅危寃。雖招而未返。念惛惛之安往。復挈挈以此來。豈忘慚羞。實恃矜惻。老馬已甘於伏櫪。敢望長途窮猿。方切於投林。况依茂蔭。斯蓋伏遇某官資函英達。學蘊淵源。早奪竒謀。蓋處囊而立見。晚更劇任。真游刃以無前。寶儲直中禁之嚴。玉節寄西陲之重。曲憐狂簡。

自致漂流，每假借於餘談，爲經營其一飽，致茲小
憇，盡出大恩。某敢不痛洗，昨非姑休，疲役招陵，笠
澤雖賒，故國之歸期，錦江草堂聊竊老師之補處。

與成都張閣學啟

薄游萬里，最爲天下之窮，攝守一官，猥與幕中之
辯，將携孥而就食，敢削牘以告行，伏念某下愚難
移，大惑莫解，光陰晚晚，已逾不惑之年，簿領沉迷，
猶在無聞之地，嗟征途之可厭，捨舊館而疇依，爲
晏平仲執鞭，旣云素願，就謝仁祖乞食，寧復自疑。

茲承行省之移，遣備大藩之屬，雖剡章之未報，輒
懷檄以徑前，冒行世俗之譏訶，實恃門闌之知獎，
老馬已甘於伏櫪，敢望長途，窮猿方切於投林，况
依茂蔭，恭惟某官學函經濟，洞極誠明，秉心無邪，
不媿於俯仰之際，體道自得，有見於參倚之間，學
倡諸儒，惠加多士，雖困窮之自取，亦提挈而不遺，
照隱察微，每能得之濠土，哀窮悼屈，幾若推之溝
中，施及孤生，亦叨異顧，某敢不暫休疲役，痛洗昨
非，陪蓮幕之英遊，雖知遲暮，居草堂之補處，尚切

光華

答勾簡州啟

近被臺移來陪幕辯以海內孤寒之迹假天涯獨
冷之官但虞譏訶誰肯慰藉忽奉華牋之况豈勝
末路之榮伏念某性資冥頑問學衰廢畱落殊方
者累歲竒窮舉世而一人雖夢寐思歸類澤國春
生之鴈而巾瓶無定如雲堂旦過之僧比叨闈屬
之招實過野人之分方刻章而待報忽捧檄以徑
前久矣倦遊幸茲小憇此盖伏遇某官風猷凝粹

志節清真念俛俛浪迹之安歸假疊疊餘談而借
助遂容萍梗暫息道途惟此意之甚恩實衰俗之
創見而某自侵晚景久歇壯心理刻曲之歸舟方
從此日卜浣花之絕境敢倣先賢

與李運使啟

伏審抗章力請優詔曲從雖暫勞諭蜀之行然益
見回天之力恭惟某官致知格物學道愛人親承
西洛之正傳獨殿中朝之諸老至於盤礴遊戲之
翰墨嬉笑怒罵之文章過黃初而有餘嗟正始之

復見飛騰捷路，耻煩狗監之吹噓，散落遐荒，寧付
鷄林之鑑識。比下九天之號召，已傾四海之觀瞻。
不俟駕行，命義雖存於大戒，可以理奪。忠孝果得
而兩全，方帥闡之猶虛，以計司而兼莅，仰惟臺省
清華之宿望，加以山林高逸之雅懷。一琴一龜，預
想鈴齋之靜；三熏三沐，尚陪藥市之遊。過此以還，
未知所措。

賀葉樞密啟

恭審顯膺明詔，進貳鴻樞。道大材全，固視功名爲

餘事。任隆位重，蓋倚精神之折衝。衆志交孚，太平
可冀。伏聞今昔有不移之形勢，華夷有一定之土
疆。故彼不可越，燕薊而南，侵猶我不能跨。遼碣而
北，守堯舜尚無冠帶百蠻之理。天地豈忍羶腥諸
夏之區，又况以本朝積累而當荒陋崛起之小夷。
以陛下神武而討衰弱僅存之孱虜，重以軍民之
憤切，加之廟祏之威靈，當一震於雷霆，宜坐消於
氛祲。夫何玩寇久使，逋誅九聖。故都視同棄屣，兩
河近地進若登天。莫宣方叔之壯猷，更類棘門之

兒戲坐殫民力、孰奮士心、上方撫髀而喟然、公宜
出身而任此、恭惟某官負沈雄邁往之畧、躬英發
絕人之姿、撫卷慨慷、夙有四方之大志、立朝開濟、
晚收九牧之重名、果副簡求、肆當柄任、以元龍湖
海之氣、叅子房帷幄之籌、北斗以南一人、誰其倫
儼、長安之西、萬里行矣、清夷某識面、莫先託身、最
早側聽、延登之渥、自悲淪落之餘、雖意氣摧藏、非
復雕鸚離風塵之望、然飢寒感迫、猶懷駑馬戀棧
豆之思、敢敬布於微誠、覬少回於曩睠、

賀龔叅政啟

恭審光膺明詔、進貳政機、爲治不難、其道顧何如
耳、用人若此、吾國其庶幾乎傳聞、四方驩喜一意、
某聞公論未嘗盡廢、常恐不在於朝廷、小人豈必
無材、惟患與聞於國事、誠使元臣大老守紀綱而
不紊、近習外戚保富貴而有終、政一出於廟堂、權
弗移於貴倖、豈獨坐消於外侮、固將馴致於太平、
孰成伊尹格天之功、其在孟子敬王之學、恭惟某
官材負超軼器局、恢闕造道深、故能泛應而不窮、

進身正故敢盡言而無諱建久安之勢成長治之業已收效於立談開衆正之路塞羣枉之門曾不勞於變色薦紳相賀史冊有光然而仁人先天天下而憂重矣自任賢者備春秋之責艱哉克終某十年獨荷於異知萬里敢虛於忠告輒因尺牘罄寫寸誠未死殊方或見丕天之偉績猶期末路終爲盛世之幸民

答南劔守林少卿啟

比解邊城猥叨使傳顧惇惇之寡助宜挈挈而亟

行揣分已踰置慚靡所伏念某百罹薄命九折窮途軼蕩文辭已困諸生之小技沉迷簿領又無俗吏之能聲乃者來歸頽然遲暮進趨梗野占奏空疎宜居擯斥之科敢辱光華之命茲蓋伏遇某官道該聖蘊學擅經邦獨倡諸儒躬伊尹天民之先覺興憐末路念正元朝士之無多致此妄庸亦叨臨遣某方圖馳問已辱詒書墨妙筆精雖喜窺於近製頭童齒豁更自感於殘年

上趙叅政啟

造於王廷、旣盡除於宿負、試以使事、復躡被於明、恩、豈惟寬溝壑之憂、遂亦有桑榆之望、大鈞難報、末路知榮、伏念某固陋不通、迂疎寡合、雖抱宿道、鄉方之志、了無赴工趨事之能、迨從幕府之遊、始被邊州之寄、方漂流於萬里、望飽煖於一麾、豈圖下石之交、更起鑠金之謗、素無實用、以爲頽放、則不敢辭、橫得虛名、雖曰僥倖、而非其罪、甫周歲律、再畀守符、曾未綰於印章、已遽膺於號召、遂以羈旅入朝之始、首預光華遣使之行、此蓋伏遇某官

造德精微、宅心忠厚、念錦里十年之卜築、已是蜀人、憐萍蹤萬里之來歸、特捐漢節、蕭然遲暮、被此恩榮、某敢不歛散視豐凶之宜、阜通去農末之病、觀近臣以其所主、期無負於深知、非俗吏之所能爲、或粗施於素學、過此以往、未知所裁、

江西到任謝史丞相啟

詣行在所、方承命以北馳、駕使者車、復改轅而西、上訓詞甚寵、地望加優、本宜使之省循、乃更增其僥倖、伏念某性資鄙陋、學問荒唐、雖慕長者之餘

風、豈、聞、君、子、之、大、道、早、親、函、丈、偶、竊、緒、餘、曾、未、免、
於、鄉、人、乃、見、待、以、國、士、知、憐、覆、護、殆、塵、沙、曠、劫、之、
難、逢、顏、墮、摧、藏、無、絲、髮、微、勞、之、上、報、昨、者、甫、還、吳、
會、卽、使、甌、閩、超、躡、旣、多、便、安、猶、極、徒、以、久、違、於、公、
袞、悵、然、願、事、於、師、門、山、川、間、之、日、月、逝、矣、方、坐、馳、
於、夢、想、忽、祇、奉、於、詔、追、深、惟、幸、會、之、非、常、但、懼、奔、
馳、之、弗、及、夫、何、竒、蹇、更、累、生、成、方、仇、怨、造、言、投、鼠、
不、思、於、忌、器、乃、保、全、極、力、舍、牛、寧、廢、於、爨、鐘、此、盖、
伏、遇、某、官、偉、量、包、荒、深、仁、篤、舊、念、招、之、來、而、麾、之、

去、若、匪、近、於、人、情、謂、舍、其、短、而、取、其、長、猶、可、勝、於、
官、使、故、推、餘、潤、以、及、枯、芟、而、某、筋、力、疲、於、往、來、疾、
恙、成、於、憂、畏、質、疑、問、道、自、憐、卒、業、之、何、時、訟、過、戴、
恩、尚、冀、收、身、於、末、路、

謝王樞密使啟

請、行、在、所、方、承、詔、以、北、馳、駕、使、者、車、腹、改、轅、而、西、
上、訓、詞、甚、寵、地、望、加、優、伏、念、某、拳、曲、散、材、適、回、末、
路、浪、遊、山、澤、不、知、歲、月、之、屢、遷、篤、好、文、辭、自、是、書、
生、之、一、癖、斐、然、妄、作、本、以、自、娛、流、傳、偶、至、於、中、都、

覽賞遂塵於乙夜、旣閱期年之久、兩膺召節之頒、雖改命於半途、尚乘輶於名部、始終僥倖、進退光榮、茲蓋伏遇某官、謨明弼諧、任重道遠、以國士待我、卓爲特達之知、於古人求之、每極吹噓之論、詔除屢下、罷使不遺、雖云薄命之顛、儕要是公朝之記省、某敢不竊簿書之暇日、求學問之新功、構櫺侏儒、儻未捐於大匠、雕蟲篆刻、尚少進於曩時、庶仰答於上恩、亦粗酬於鈞播、過此以往、未知所裁、

謝臺諫啟

祈天請命、冀循省於窮閭、便道之官、復馳驅於近甸、始終僥倖、俯仰兢慚、伏念某鄙朴不材、荒唐寡學、生逢盛際、無尺寸之可稱、久戍遠方、賴斗升而自活、昨蒙臨遣、已劇超遷、但虞薄祐之難勝、寧復異恩之敢望、未溫坐席、遽辱賜環、初疑誤報於姓名、俄乃真承於詔命、人才吏事、何者粗堪、自計旁觀、居然不允、敢謂并包之廣大、更令進退之從容、此蓋伏遇某官、山立英資、海涵偉量、盡言劇論、雖震聳於朝端、用恕持平、每保全於士類、遂容末路、

獲忝優除俯伏以思論報何所而某昨緣奔走積困沉綿顧影獨悲豈久堪於從宦服勤不怠尚少贈於空餐

答本路郡守啟

末路賜環本出聖知之舊半途畀節尚承寵命之新揣分實踰置慚靡所伏念某易搖弱植無用散材轍環天下而老于行寧非薄命舟近神仙而引之去殆有宿緣方力丐於退藏乃更叨於臨遣此蓋伏遇某官指南公議推轂時髦顧雖流落之餘

亦在揄揚之末某方勤馳傳未卜登門頌詠之私敷宣罔既

賀葛正言啟

恭審傑直北扉方演出綸之命拾遺西省遂輸補袞之忠上虛佇於嘉言士共歸於顧望恭惟某官英辭擅世偉識絕人諸老先生聞名而願交學士大夫望氣而知敬讐書羣玉之府視草承明之廷比傳夜對之從容屢動天顏之忻懌主聖臣直共知千載之逢言聽諫行獨任七人之責木從繩而

必正石投水以奚難某屬以乘輅阻陪賀厦比年
十漸必盡告於吾君一旦九遷將孰先於門下其
爲抃躍罔罄敷陳

賀周叅政啟

恭審顯奉廷揚進陪國論號令渙焉可述乃專討
論潤色之功疇咨若時登庸遂處輔弼疑丞之位
國有隆儒之盛士知稽古之榮伏以典謨實列於
六經臣主難逢於千載高文大冊或託之不得其
人老師宿儒有死而莫見於世維時鴻碩之彥早

冠清華之途成功告於神明大業刻之金石發德
音下明詔大哉王言建顯位施尊名震於方外一
變猥釀枝駢之躰復還雄深灑噩之風縉紳竊誦
而得師夷狄傳觀而動色顧於昭代可謂殊勲雖
箕穎之志屢陳然莘渭之求焉往恭惟某官任重
而宏毅謨明而弼諧以窮深測遠之才坐酬衆務
以極高蟠厚之氣陰折遐衝至於擅世之英辭本
皆全德之餘事僅少施于一二已見謂於崇德豈
容卷懷經濟之圖遂欲袖手寬閑之地公母困我

初誦留行之言，上誠知人，亟下延登之命。然易簡者，聖君之眷，難居者，天下之名。方仰對於寵光，願益思於挹損，茂迪謙尊之吉，永爲善類之依。

賀謝樞密啟

恭審顯膺出綽，進貳本兵，蠻夷奪氣而息謀，朝野動容而相慶。恭惟某官英猷經遠，敏識造微，秉心如金石之堅，論事若權衡之審。主知千載，際聖世之風雲；言責三年，極人才之涇渭。士恃公平而不恐，上嘉孤直之無朋。遂由常伯之聯進，貳中樞之

任較一時之同進，得喪孰多。付四海之僉言，忠邪自見。固將力回薄俗，盡建明謨。網漏吞舟，示太平之寬大；雲興膚寸，澤庶物之焦枯。豈惟康濟於茲時，固足儀刑於後世。某早迂記省，晚荷甄收。雖知薄命之多竒，猶復誦言而不置。使駑馬妄思於十駕，而沉舟未羨於千帆。求之古人，可謂曠世難逢之會；報以國士，敢忘終身自勵之心。

賀禮部鄭侍郎啟

恭審筆橐陞華，資論思於禁路；絲綸出令，兼潤色

於皇猷共知儒術之益尊孰謂太平之無象恭惟
某官好是正直擇乎中庸大冊高文固已寫之琬
琰崇言欲議皆可質於鬼神殆將與日月而爭光
奚止當雷霆而獨立惟上聖克勤於總攬察羣臣
各盡於才能謂其代予言旣久煩於鴻碩求能典
朕禮宜無易於老成况以南省之要司仍寓西垣
之舊直惟時異數實冠清途然而文關國之盛衰
官以人而輕重籲俊尊上帝豈止在玉帛鐘鼓之
間歛福錫庶民其必有典謨訓誥之盛視古無愧
非公而誰所冀復如三代禮樂大備之時抑亦追
還兩漢文辭爾雅之體顧雖老矣尚及見之

上丞相叅政乞宮觀啟

年運而往益知涉世之艱職思其憂獨幸侍祠之
樂惓惓微志懇懇自陳伏念某擁腫凡材聳牙曲
學旣無甚高論足以譁世豈有它繆巧用以致身
隨牒半生問津萬里雖誓圖微報不勝狗馬之心
而俯迫頽齡已罹霜露之疾壯志纍然而欲盡殘
骸悴爾以難支拉朽摧枯競爲排陷哀窮悼屈孰

借聲光、敢圖廊廟之尊、未棄門闌之舊、曲憐不逮、力謂無他、至於跌宕之文、辱在褒稱之域、然而揣數竒之薄命、懼徒費於鴻鈞、與其度越羣材、留朱雲於東閣、曷若稍捐薄祿、置陶令於北窻、伏望某官仁風翺及物之恩、赫日照覆盆之陋、念前跋胡而後躄尾、惟當自屏於江湖、方上照天而下漏泉、恐使獨擠於溝壑、假以毫端之潤、寵其林下之歸、某謹當刻骨戴恩、剗心慕道、誦丹臺之藥笈、少慰素懷、拜玉局之冰銜、用華晚景、

知嚴州謝王丞相啟

故里浮沉、竊玉局再期之祿、公朝拔拭、付桐江千里之民、瓜戍非遙、竹符甚寵、感淪病骨、愧溢衰顏、伏念某元祐黨家、紹興朝士、池魚澆滸、本思自放、於江湖社櫟、支離久已、難施於斤斧、繇治生之素拙、因從宦以忘歸、頃自吳中、久留劔外、顧被衣冠之所萃、頗以文字而相從、方深去國之悲、敢有擇交之意、流偶殊於涇渭、風自隔於馬牛、睚眦見憎、本出一朝之忿、排擠盡力、幾如九世之讐、藐是羈

孤孰爲別白、縱免投荒之大罰、亦宜置散以終身、
且定遠未歸、惟望玉關之生入、輕車已老、猶護北
平之盛秋、豈有朝爲閭閻廢斥之人、暮竊畿輔承
宣之寄、茲蓋某官學窮突奧、勲塞堪輿、南山巖巖、
冠公師之重任、赤寫几几、同宗社之閔休、念人才
之實難、悼士氣之不振、埏陶至廣、收拾無遺、方與
物以皆春、憫向隅之獨泣、爓和輿論、濶畧彝章、起
安國於徒中、較恩未大、還管寧於海外、爲力尚輕、
而某少非列於通才、晚徒專於樸學、棄雞肋而猶

惜、雖仰戴於深仁、續鳧脛則自悲、恐難逃於薄命、

謝黃叅政啟

病餘揣分、靳續食於叢祠、望外疏恩、俾牧民於近
郡、感深雪涕、慙劇駢顏、伏念某早歲多艱、晚途益
困、岷嶓巉絕、身行禹貢之書、雲夢蒼茫、口誦楚騷、
之句、未塋支離之骨、辱招羈旅之魂、八千之路、雖
還五十之年、已過視荒荒而益廢、髮種種以堪哀、
斷港絕潢、徒有朝宗之願、朽株枯木、何施造化之
功、雖存溝壑之餘生、已是簪紳之棄物、驚宿愆之

盡洗知孤迹之少安、如絲如綸、命出西垣之潤色、
有民有社、地連右輔之封圻、矧復嚴瀨遺祠、桐山
故隱企高風之如在、顧俗狀以自慙、此蓋伏遇叅
政相公黼黻望猷、權衡國是、衆仰規模之大、天知
議論之公、謂設廉耻以遇羣臣、士斯自好、且蹈仁
義則爲君子、人亦何常、務與惟新、不求其備、某謹
當銘膺感德、擢髮思愆、弱羽遶枝、姑低回於晚景、
靈丹點礫、儻邂逅於初心、

謝施叅政啟

起由散地、畀以專城、命出詞垣、仰戴絲綸之寵、名
居節鎮、俯慙章綬之華、偃僂拜恩、謔諄叙感、伏念
某薄才繇力、多病早衰、竊慕長者之餘風、每思砥
礪未聞君子之大道、徒益顛危、零丁稷下之遊、寂
寞漳濱之卧、尚無漂母哀王孫而進食、况有故人
憐范叔而贈袍、牛欲釁鐘、誰其弗忍、婦非束縕、何
以自還、敢期累年不振之蹤、忽有一旦殊常之遇、
光生分表、喜溢情涯、惟茲山水之邦、自昔詩書之
俗、修門在望、曾無日近之嗟、先世嘗臨、獲慰露濡

盡洗知孤迹之少安如絲如綸命出西垣之潤色
有民有社地連右輔之封圻矧復嚴瀨遺祠桐山
故隱企高風之如在顧俗狀以自慙此蓋伏遇叅
政相公黼黻望猷權衡國是衆仰規模之大天知
議論之公謂設廉耻以遇羣臣士斯自好且蹈仁
義則爲君子人亦何常務與惟新不求其備某謹
當銘膺感德擢髮思愆弱羽遶枝姑低回於晚景
靈丹點礫儻邂逅於初心

謝施叅政啟

起由散地畀以專城命出詞垣仰戴絲綸之寵名
居節鎮俯慙章綬之華僂僂拜恩譖諄叙感伏念
某薄才繇力多病早衰竊慕長者之餘風每思砥
礪未聞君子之大道徒益顛危零丁稷下之遊寂
寞漳濱之卧尚無漂母哀王孫而進食况有故人
憐范叔而贈袍牛欲釁鐘誰其弗忍婦非束縕何
以自還敢期累年不振之蹤忽有一旦殊常之遇
先生分表喜溢情涯惟茲山水之邦自昔詩書之
俗修門在望曾無日近之嗟先世嘗臨獲慰露濡

之感此蓋伏遇參政相公至仁善下感德兼容一
引坐一解顏士託終身之重三吐哺三握髮野無
片善之遺賢能借勢以騫騰孤遠望風而傾屬自
悲蓬梗獨遠門闌向使不爲萬里之行固亦久在
諸生之末誦文章於方冊竊喜得師聞道義於薦
紳亦嘗願學旣積精誠之久果歸甄冶之公旅進
無階歎空馳於清夢餘年有幾懼終負於初心

謝臺諫啟

貧念代耕之祿懇乞奉祠恩開使過之門復令治

郡方窮閭之待盡非公議而疇依慙極駢顏感深
雪涕伏念某遭回薄命顛頓餘生隸業荒唐小學
僅通於蒼雅屬辭卑弱竒文徒慕於莊騷髮種種
以將童心挫挫而欲折食粥動逾於累月陳絺或
至於隆冬不能引分以掛冠廉隅已喪更復貪榮
於懷綬愧懼可知况此名城今爲近輔九霄嘉氣
日未邇於長安千載遺祠星嘗從於帝座孰爲之
地使有此行茲蓋伏遇某官偉量海涵英姿山立
衆惡之而必察俯憐久困於風波今老矣而無能

尚使少紆於溝壑、爲國廣旁求之路、示人無終棄
之才、曾是妄庸、曲蒙全護、除書已下、徒叨湔洗之
恩、羸疾益侵、無復激昂之日。

謝葛給事啟

杜門訟六十年之非、久安散地、起家忝二千石之
重、忽奉明恩、驚釁垢之漸除、扶衰殘而下拜、伏念
某學由病廢、仕以罪歸、冥心鵠鷺之行、投迹雞豚
之社、海三山之縹渺、釣鼈已媿於初心、楚七澤之
蒼茫、殪兒亦成於昨夢、但欲負耒、慕許行之學、豈

復叩角歌、寧戚之詩、偶逢公朝、使過之時、躡昇近
郡承流之寄、所蒙過矣、自揆茫然、天際鬱蔥、望九
重之雲氣、道周蔽芾、掃四世之棠陰、得遂此行、孰
爲之地、此蓋伏遇侍講給事道本文王之正學、師
孟氏之醇騰、茂實而蜚英聲、久隆上睠、息邪說而
距詖行、遂擅儒宗、方與萬物而皆春、不忍一夫之
獨泣、某偶階末契、遂借餘光、雖飯豆羹、藜不敢望
功名於老大、然書紳銘座、尚思復玷缺之艱難。

謝梁右相啟

玉局二年已竊代耕之祿、桐廬千里復叨起廢之恩、望睟表之顛昂、撫編氓之繁夥、退惟忝冒、徒積兢慚、伏念某四壁寒家、一簞賤士、刻舟求劍、固非通材、懲羨吹壑、已消壯志、比由蟹舍、起領魚符、永言久斥之餘、亦有少伸之望、然而察簿領稽違之細、擿吏胥隱伏之微、一皆非其素知、又不可以遽習淵明之寄事外、已迫顏齡、安國之擢徒中、曷勝煩使、此蓋伏遇某官才全經緯、氣塞堪輿、博取衆材、婁抗延英之論、宏開公道、靡須光範之書、施及

妄庸、未忘夙昔、溫飽一門之衣食、洗滌累歲之罪愆、使爲全人以畢餘日、某敢不好是正直、擇乎中庸、戒舞智以賊民、寧取椎魯少文之誚、務盡心於折獄、庶無冤枉失職之嗟、苟不辱知、其敢言報、

謝周樞使啟

入望清光、出臨近郡、天威不違咫尺、旣諧就日之心、父命惟所東西、况被牧民之寄、感恩至矣、揣分茫然、伏念某下愚難移、大惑莫解、不能高飛遠舉、求避橫目之民、乃復直情徑行、自掇噬臍之悔、永

言窮薄、數蹈遭回、毀靡待於德高、災非由於福過、
斷雲零落、敢懷出岫之心、病鶴襍褫、忽忝乘軒之
寵、此蓋伏遇某官道窮突奧、氣塞堪輿、南山之石
巖巖、帝資宿望、綈袍之意、戀戀、士感誠言、哀細德
之、嶮微、開鴻鈞之、塊、北、念茲積譴、雖擢髮而有餘、
察彼衆讒、亦吹毛之、已、甚、未加顯棄、聊復少收、雖
不在於英材樂育之中、實創見於薄俗相挺之際、
而某扶衰自笑、迫老宜歸、無復入關西日舉釣竿
之手、惟希度世東封、謁玉輅之塵、傾倒具陳、慚惶

無措

謝臺諫啟

掛洪景之衣冠、宜還故里、懷買臣之印綬、尚冒明
恩、觸熱卽途、扶衰領郡、伏念某身常短褐、家本衡
門、一官惟妻子之謀、萬里極關河之遠、景翳翳以
將入、餘日幾何、芳菲其彌、章素心空、在比者竊
冰街於玉局、築雲屋於鏡湖、惟俟引年、遂將沒齒、
散地方、斬於因任、除書忽畀於專城、宮闕中天、有
就日望雲之幸、鄉閭接壤、逾過家上冢之榮、此蓋

伏遇某官望重朝綱、學通國體、收真才於水落不
出之後、坐銷浮偽之風、察定理於舟行岸移之時、
盡黜讒誣之巧、稍收久廢用示、至公某謹當勉効
微勤、堅持素守、吏犯法而法在先、務去姦政、近民
則民歸、敢忘用恕、或粗逃於大譴、庶少答於深知、

與汪郎中啟

去蜀歸吳、已侵尋於晚景、乞祠得郡、尚記錄於明
時、夙戒行艫、已臨弊邑、方竊依仁之幸、敢稽告至
之恭、伏念某笠澤農家、紹興朝士、捫參歷井、久困

客遊、煮海摘山、屢乘使傳、旣罪愆之未洗、復衰疾
之相乘、骨相宜窮、頭顱可揣、穿延和之細仗、恍若
隔生、分新定之左符、更叨起廢、恭惟某官義存推
轂、德重匿瑕、哀其顛顛之百罹、借以揄揚之一諾、
遂容共理之寄、亦及歸耕之餘、而某扶憊以來、罔
功是懼、快景星之先覩、雖尚阻於瞻承、分鄰燭之
餘光、遂密依於覆護、其爲慰幸、曷究敷陳、

賀賈大諫啟

恭審顯膺一札之頒、首冠七人之選、主賢臣直、國

勢巋然言聽諫行天下幸甚某聞在昔本朝之官制參稽前代之舊章南臺不置大夫中憲任紀綱之重寄北省久虛常侍諫坡率遺補以盡規選求既艱畀託尤重故政出中書而常開言路事由獨斷而不廢爭臣仰觀十一聖家法之傳茲爲二百年治功之本繼昔之盛非公而誰恭惟某官學造精微器函閎遠許國弗渝於夷險憂時如抱於渴飢造膝告猷浩浩江河之決傾心愛士拳拳涇渭之分慨然死生禍福不入於中常若天地鬼神實

臨其上以今日陳善之效成異時贊化之功同出此心夫孰能禦某侵尋暮景躑躅孤生迹本甚踈妄欲依歸於公道分當永棄特蒙杖拭於窮途何以仰答門闌特達之知惟有稍陳郡縣利病之實儻少寬於斧鑕尚嗣布於腹心

賀周丞相啟

恭審夢卜襲祥揚王庭而渙號典冊備物熙帝載以宅師國其庶幾民以寧壹實惟宗社無疆之祐非復門闌旅賀之常竊以時玩久安輒生天下之

患國無遠畧必有意外之虞方今風俗未淳名節弗勵仁聖焦勞於上而士夫無宿道嚮方之實法度修明於內而郡縣無赴功趨事之風邊防寢弛於通和民力坐窮於列戍每靜觀於大勢懼難待於非常至若靖康散亂而遺平城之憂紹興權宜而蒙渭橋之耻高廟有盜環之逋寇乾陵有斧栢之逆儔江淮一隅夫豈仗衛久留之地梁益萬里未聞腹心不貳之臣文恬武嬉戈朽鉞鈍謂宜博采衆謀之同異然後上咨廟論之崇嚴非素望之

偉然誰出身而任此恭惟某官降神維嶽生德自天居安資深學洞六經之韞探賾索隱識窮萬務之微盖嘗獨立以當雷霆何止貴名之揭日月運籌帷幄每當上心端委廟堂遂持國柄玉燭肇時和之慶雲龍協聖作之辰清未央長樂之宮將肅六飛之御築碣石榆林之塞永奠四夷之封于古有光自今以始某側聞盛舉實抃驩悰惜百口之飢寒豈無竊覲拔四方之英俊願付至公庶未死之餘生覩太平之盛際

除直文華閣謝丞相啟

秩視大蓬已竊垂車之寵恩加邃閣更叨出綽之榮初聞道路之傳猶謂姓名之誤迨茲被命重以懷慚伏念某承學迂踈稟資蕞陋幼生京洛尚爲全盛之編氓長綴班聯曾是中興之朝士福未容於盈背崇已駭於燒城西征至岐鳳之間南戍掠旣閩之境晚僅升於省闈旋即返於鄉關鶴歸遼天狐死丘首蓬戶十移於歲律幔亭四閱於祠官以遂屏居非始掛冠之日盡捐半俸真爲納祿之

人豈期垂盡之光陰忽玷殊常之惠澤復緣詔札併竊身章里巷聳觀共仰恩光之下燭兒孫扶拜不知衰涕之橫流茲蓋伏遇某官降命應期奮庸熙載神無方易無體心獨運於道樞尺有短寸有長士悉歸於鈞播雖迫崦嵫之景亦歸塊北之公而某意氣空存筋骸已憊草具明堂辟雍之禮雖遭甚盛之時塗竄清廟生民之詩其在方來之雋

謝費樞密啟

猥被恩綸躡持從橐處內閣諏咨之地繼大門揚

歷之榮、揣分奚堪、置慚靡所、伏念某百罹薄命、九折窮途、身久困於多言、年已侵於大耄、都門屢入、壯遊恍似於前身、冊府再來、衆吏多非其舊、識拔衰殘、而就列、刮醫膜以紬書、非徒莫揜於旁觀、每亦不勝其自媿、惟埃奉篇之御、卽伸請老之誠、敢謂遭逢、曲蒙識拔、茲蓋伏遇某官道尊皇極、學統聖傳、雖吐哺握髮之勞、曾靡遺於一士、然引坐解顏之遇、顧豈在於他人、每屈崇嚴、不移疇昔、爰自東壁圖書之府、俾躋西清鷓鷯之班、驥伏櫪以悲鳴、曩誰念者、犬舐丹而僊去、今乃似之、某燈火尚親、簞瓢未厭、修世官而不墜、益體上恩、繼家學於寢、衰或傳來、喬庶幾瞑目、無媿初心。

跋語

四六之學唐宋名公率取剩技爲之便爾當家其
耑門者描摹架格雖極工能譬之天厩諸驄已就
啣勒嘶風撇雲之氣爲之頓減故二李方洪劄牘
盛傳非不膾炙神弗王也石簣先生天人儒釋統
涵胸笥間作儷語不尚浮采車攻徒御肅然馳驅
白雲偶歌遂空下里要其淵源至邃律呂相和卽
所評六家表啟條貫義類燦然更新文府武庫鼓
吹在是矣要惟先生能測諸家之大故能用其小

能覈諸家之實故能咀其華如遊觀者涉秦庭履
漢苑親覩百二山河千門萬戶之勝故未央井幹
栢梁剩材皆可舉爲游目矢口之助非卧丈室披
寸圖坐而談天表者比也諸家不以此見長而長
自見先生不以此盡諸家之長而長亦自盡讀書
者似宜家置一帙也予會先生令甥何君於武林
首示此編爰命鋟之以公諸喜讀唐宋文者
天啟辛酉嘉平月歸安後學茅兆海巨宗父識

